

遵義府志

卷四十五之四十六

藝文

廣弘明

遵義府志卷四十五

藝文四

詩一

周秦

士風詩

川崖惟平其稼多黍旨酒嘉穀可以養父野惟阜仰
彼稷多有嘉穀旨酒可以養母

祭祀詩

惟曰孟春獮祭彼崖永言孝思享祀孔嘉彼黍既潔
彼儀惟澤蒸命良辰祖考來格

好古樂道詩二章

日月明明亦惟其名不朽難獲誰能長生
惟德實寶富貴何常我思古人令聞令望

按右四詩載常璩巴志遵義在周秦爲巴之西南
鄙通志藝文失載今特表出

又按全蜀藝文志載隋楊素贈薛播州詩十四首
考道衡傳乃爲潘州且播州至唐始置其誤無疑
故不錄

唐

經亂離後天恩流夜郎憶舊遊書懷贈江夏韋太守

良宰

李白

天上白玉京十二樓五城仙人撫我頂結髮受長生
誤逐世間樂頗窮理亂情九十六聖君浮雲挂空名
天地賭一擲未能忘戰爭試涉霸王略將期軒冕榮
時命乃大謬棄之海上行學劍翻自哂爲文竟何成
劍非萬人敵文竊四海聲兒戲不足道五噫出西京
臨當欲去時慷慨淚沾纓嘆君倜儻才標舉冠羣英
開筵引祖帳慰此遠徂征鞍馬若浮雲送余驃騎亭
歌鐘不盡意白日落昆明十月到幽州戈鋌若羅星
君王棄北海掃地借長鯨呼吸走百川燕然可摧傾

心知不得語卻欲棲蓬瀛彎弧懼天狼挾矢不敢張
攬涕黃金臺呼天哭昭王無人貴駿骨綠耳空騰驤
樂毅儻再生于今亦奔亡蹉跎不得意驅馬過貴鄉
逢君聽絃歌肅穆坐華堂百里獨太古陶然臥羲皇
徵樂昌樂館開筵列壺觴賢豪間青娥對燭儼成行
醉舞紛綺席清歌繞飛梁歡娛未終朝秩滿歸咸陽
祖道擁萬人供帳遙相望一別隔千里榮枯異炎涼
炎涼幾度改九土中橫潰漢甲連胡兵沙塵暗雲海
草木搖殺氣星辰無光彩白骨成如山蒼生竟何罪
函關壯帝居國命懸哥舒長戟三十萬閉門納凶渠

公卿奴犬羊忠讜醞與菹二聖出游豫兩京遂卽墟
帝子許專征秉旄控強楚節制非桓文軍師擁熊虎
人心失去就賊勢騰風雨惟君固房陵誠節冠終古
僕臥香爐頂浪霞嗽瑤泉門開九江轉枕下五湖連
半夜水軍來尋陽滿旌旃空名適自誤迫脅上樓船
徒賜五百金棄之若浮烟辭官不受賞翻謫夜郎天
夜郎萬里道西上令人老掃蕩六合清仍爲負霜草
日月無偏照何由訴蒼昊良牧稱神明深仁恤交道
忝青雲客三登黃鶴樓顧慙禰處士虛對鸚鵡洲
樊山霸氣盡寥廓天地秋江帶峩眉雪川橫三峽流

萬舸此中來連帆過揚州送此萬里目曠然散我愁
紗窗倚天開水樹綠如髮窺日畏街山促酒喜得月
吳娃與越艷窈窕誇鉛紅呼來上雲梯含笑出簾櫳
對客小垂手羅衣舞春風賓跪請休息主人情未極
覽君荆山作江鮑堪動色清水出芙蓉天然去雕飾
逸興橫素襟無時不招尋朱門擁虎士列戟何森森
剪鑿竹石開滎流漲清深登樓坐水閣吐論多英音
片辭貴白璧一諾輕黃金謂我不媿君青鳥明丹心
五色雲間鵲飛鳴天上來傳聞赦書至卻放夜郎迴
暖氣變寒谷炎烟生死灰君登鳳池去勿棄賈生才

桀犬尙吠堯匈奴笑千秋中夜四五嘆常爲大國憂
旌旄夾兩山黃河當中流連雞不得進飲馬空夷猶
安得羿善射一箭落旄頭

流夜郎半道承恩放還兼欣尅復之美書懷示息秀才

黃口爲人羅白龍乃魚服得罪豈怨天以愚陷網目
鯨鯢未翦滅豺狼屢翻覆悲作楚地囚何由秦庭哭
遭逢二明主前後兩遷逐去國愁夜郎投身竄荒谷
半道雪屯蒙曠如鳥出籠遙欣尅復美光武安可同
天子巡劍閣儲皇守扶風揚袂正北辰開襟攬羣雄

胡兵出月窟雷破關之東左掃因右拂旋收洛陽宮
迴輿入咸京席卷六合通叱咤開帝業手成天地功
大駕還長安兩日忽再中一朝讓寶位劍璽傳無窮
媿無秋毫力誰念雙鑠翁弋者何所慕高飛仰冥鴻
棄劍學丹砂臨爐雙玉童寄言息夫子歲晚陟方蓬
憶秋浦桃花舊遊時竄夜郎

桃花春水生白石今出沒搖蕩女蘿枝半挂青天月
不知舊行徑初拳幾枝蕨三載夜郎還於茲鍊金骨
流夜郎贈辛判官

昔在長安醉花柳五侯七貴同杯酒氣岸遙凌豪士

前風流尚落他人後夫子顏紅我少年章臺走馬着
金鞭文章獻納麟麒殿歌舞淹留玳瑁筵與君相謂
長如此寧知草動風塵起函谷忽驚胡馬來秦宮桃
李向誰開我愁遠謫夜郎去何日金雞放赦回

流夜郎題葵葉

慙君能衛足嘆我遠移根白日如分照還歸守故園
流夜郎聞醵不預

北闕聖人歌太康南冠君子竄遐荒漢醵聞奏鈞天
樂願得風吹到夜郎

南流夜郎寄內

夜郎天外怨離居明月樓中音信疏北雁春歸看欲

盡南來不得豫章書

俱本集

按太白未至夜郎辨見古跡集中詩及夜郎者甚多皆半道作也茲錄數首欲即本詩見竄還始末而已

題樓山石笋

李白

石笋如卓筆懸之山之巔誰為不平者與之書青天

按此詩太白文集不載即他拾遺本亦無之孫志有此不知何本仍錄俟考

東蠻

柳宗元

既克東蠻羣臣請圖蠻夸狀如周書王會為東蠻第十二

東蠻有謝氏冠帶理海中自言我異世雖聖莫能通
王卒如飛翰鵬騫駭羣龍轟然自天墜乃信神武功
繫虜君臣人累累來自東無思不服從唐業如山崇
百辟拜稽首咸願圖形容如周王會書永永傳無窮
睢盱萬狀乖咿啞九譯重廣輪撫四海浩浩知皇風
歌詩鐃鼓間以壯我元戎

本集

送蠻客

張籍

借問炎州客天南幾日程江南惡溪路山遶夜郎城

送上官侍御

唐加祐

莫向黔中路令人到欲迷水深巫峽裏山色夜郎西

竹王祠

薛濤

竹王廟前多古木夕陽沈沈山更綠何處江村有笛

聲聲聲盡是迎郎曲

三詩據陳志錄

宋

人播分承宣慰卜宅櫃巖

三元開

籍隸長安襲舊員二陵風雨出秦川徂征西蜀辭家

國掃蕩南平入遠天險涉蠶叢山粉黛夷臨竹節水

潺湲漫云卜吉鍾靈秀欲報君恩望後賢

按此詩採自

相傳屬讀不甚可解始存

之

明

桃源洞口題刻三首

張道凝

破衲蓬頭方竹杖提壺到處一盤桓眼前俗事真堪

笑雨後黃花也奈看酒醉詩懷如許壯秋高洞口不

勝寒有人問我無生法只在身中九轉丹

沽酒登高一典衣卻看秋草未離披晴分野色供詩

料涼送西風入鬢絲人世不堪傷往事菊花又見繞

東籬飲餘回首誰為主洞口斜陽樹影移

或賣癡來或賣顛誰能識我是神仙有人問我家何處只在桃源洞口邊並石刻

夜郎曲三首

楊慎

夜郎城桐梓原來堞壘平村民如野鹿猶說翰林名城在桐梓驛東十餘里

夜郎溪槩木陰中半景西漁舟投棹宿水鳥逗花啼溪名趨水在東溪南古城下

夜郎歌漢宮曾取教秦娥竹枝傳窈糾楊柳轉猗儺夜郎歌即巴渝也今名思南歌補全蜀藝文志

桐梓驛元夕

戴石孤峯古驛門青羌吹角報黃昏三家村裡無燈火千樹梅花作上元

夜郎溪

行到滇南欲盡頭江邊深處隱扁舟不知孟獲巢何處料入煙蕪避武侯並陳志

松坎驛二首

劉瑞

九十春光欲莫八千客路初行宇宙有人憂世江湖何事忘情

乍雨乍晴天氣半花半鳥風光客子相看不倦詩人

高詠何妨全蜀藝文志

播南吟七首

荒草猶傳李白城夜郎憔悴若爲情半生豪氣隨煙
水千古詩名煥日星
水交菁裏有猿啼聽罷令人思欲迷聞說近來多虎
跡行人莫到日頭西
百折羊腸一徑危林深長見日光遲三坡險處君須
記正是行人滴淚時
小菁南頭大菁鄰箐中林木不知春從來鬼魅多依
石自是豺狼怕近人

何人喚此老青岡亂石磨牙險更長百杵杵來行不
到直教行客爲心忙

石虎關高似劍門戈矛森立勢雄吞行人過此應須
恐虎嘯猿啼白日昏

又向南溪入箐來一聲長嘯虎羣猜凌空石筍柴關
上卻使行人望眼開同上

平播凱旋述懷二首

劉 綖師

韜略無能繼父風西川前後領元戎重慚推轂操兵
柄敢倚平夷數戰功奕世君恩延賞久累朝官誥賜
封隆何當兩地無寧日兵火年年一樣紅

逆豎頻煩西顧憂簡書重命運前籌斬關聊施騾驢
技破囹應消汗馬愁一念孤忠懸日月千年公論付
春秋太平自是無征戰且脫戎衣歸馬牛

平播凱還書佛圖關石壁

當年先業樹蠶叢奕葉何堪振父風自信承家慚長
子敢云報國紹元戎兒童舊頌平蠻績父老新傳勦
播功武烈繆叨繇世澤孤忠一脈貫長虹

東逐西馳歲月深凱旋駐馬漫開襟三巴兵革龍泉
迴六月烽烟雁字沈關塞自維憐白髮廟廊誰與暴
丹心良弓烏盡應無用綬整魚竿釣海濶四詩並石刻

桃源洞

仗劍飛虎穴停輶憇洞天幽巖可鐫石何處不燕然
按此詩舊刻桃源洞石壁今不存

夜郎題壁

王師平播此經過勒石磨崖紀凱歌萬古千秋留勝

跡一回翹首一摩挲

二詩
陳志

上督府李公平播歌

張文耀

攬槍晝見參井滅豺虎凌人恣吞齧城頭白骨高於
山城下青江半流血明王慎德來諸夷何物妖氛黯
未披雷庭乍赫九五怒風雨旋驅百萬師師中丈人
古方叔薄伐壯猷儲滿腹遼海雄威舊渡鞭中朝特
簡新推轂推轂西來人不毛綸巾羽扇白方袍夜聞
刁斗軍聲肅晝擁牙旗殺氣高十道貔貅目無虜虘
虘人持巨靈斧險絕重關破竹開天驕殘息魚遊釜

電掣飈馳信所如犁庭掃穴奔成墟旄頭夜落蠻山
外匕首秋懸鏖戰餘歸來滿路喧笳鼓士女載歌農
父舞玉壘烟嵐淨遠空銅標勳業酬明主玉壘銅標
億萬年嶙峋半壁撐南天請看燕領封侯相定向圖

麟閣上傳續全蜀
藝文志

過螺水寺

傅光宅

螺水溪邊寺松杉一徑深好山多近戶芳樹半成陰
落日烟霞色寒宵鐘磬音浮生屬往事慷慨欲霑襟
過正安州

萬山迢遞到真州新築孤城水抱流猛虎歸來荒草

遍祥鸞一出瘴烟收梅花晴雪沿江路棠樹新陰照
郡樓最高絃歌成化理天涯旅客不知愁

曉發蓮子壩

野寺鐘鳴夜未闌驅車隨處問凋殘鶯啼谷口千林
曉馬渡溪頭二月寒流水遠從雲際落春山半向雪
中看蠻家竹屋層崖上遙指雙旌識漢官陳三志詩

平播凱歌獻大中丞李公勣

六月軍聲動海濤轅門令下鬼神號錦江浪淨眠鷗
穩玉壘雲飛舞鶴高

三尺龍泉自尚方斗牛寒色照蠻鄉千年荒服歸王

化文物初開古夜郎

海龍空迴插青天飛虎關高入紫烟霹靂一聲重險
失流星忙去捷書傳

千山萬壑遠渝州吟嘯時登庾亮樓尊俎閒看戎馬
散夕陽秋色滿漁舟

平播古風

有引

端園

予聞日昇暘谷盍旦鼓翼而飛風動商飈蟋蟀吟秋
而感况乎苗民嚮化干羽贊於虞階江漢興歌經營
歸之召穆豈無言以紀其盛哉蠢茲播賊世食土毛
甘悖天恩妄恣跋扈在聖心雖若天覆地載而王法

寧無推亡固存是以宸斷孔彰重臣委毗簡書下魚
鳧之里鐵鉞授司馬之官總制三藩坐籌勝算已乃
遡飛羽檄交輓糧芻騎士如雲材官如雨八路椽張
天之網千峰障飛鳥之塵前無堅城我有勝地維時
司馬李公手持大阿布昭聖武嚴號令必賞罰激義
勇誅逗畱文武將吏咸共戮力未幾而猿猱夜血狐
鼠霜啼梟獍晝迷豺狼宵遁自此犁庭掃穴覆社傾
巢元惡伏誅羣兇就僇俘獻靖邦之績勞書定國之
勲皇心載寧垂裳臨御天寵有赫紀績旂常豈讓虞
周全盛時耶始予蒿目境土腐心兵革念帑藏物力

之拙憫黎元轉運之艱乃捐湯沐之金少佐國家之
急祇杼丹悃匪獵虛稱幸微寵靈大爲奏凱斯已身
享太平世運矣爰效風人之志載揚抃舞之懷庶幾
賡歌以傳盛美云爾

天王御歷清寰寓謔譯羶裘知共主何來井絡見櫓
槍十載西南紛鼙鼓鳴張猿嘯萬重山渠孽乘危虎
豹關赤子半櫻鋒鏑苦巴渝喋血漲潺湲列校倉皇
布江上江郊鬼哭愁相望六縣寃銷鴻雁魂三川脂
竭蝸蜒餉潢池誰與奠春臺烽火征塵撼地來西顧
每塵宵旰慮親分節鉞下天垓喜傳制閫推司馬一

劍霜飛夜郎野何異當年李藥師居然長城萬間厦
李君自是星之精曾爲霖雨蘇蒼生東海妖鯨方汎
掃西山黠鼠敢驕鳴危巢燐蜮方噓熾諸路熊羆俄
集蝟六花夜祕鬼神機八陣雄飛天子氣忽聞凱歌
誼邵國一雨洗兵兇燄息巖巖京輔畫飛音勃勃瘡
痍人起色君不見周宣問夜兆庶功太原之伐何英
雄吾皇燕喜仍六月後先接武將無同又不見唐君
善任征淮蔡鶯鳴聲中擒巨害成謀在斷古今然此
日廟謨永開泰北門鎖鑰倚元臣頓令溥天沐好春
遙挹三台齊曳履析覘八座善調鈞岷山青青沱江

綠文治從今洽西蜀水遠山長無盡時萬古乾坤熙

玉燭

並補全蜀藝文志

平播州夷人歌

李鳳

朔風起胡笳奏蛇虺敢共蛟龍鬥夜郎何物逞妖氛
濁霧蠻烟迷白晝蠹魚宵駭出殘編慄慄不敢縹緲
眠百里無烟雞犬寂羽書飛報神堯前帝維司寇相
東魯飛牘曾蘇農商賈世揚秋烈豈乏人枚卜專制
統熊虎尙方劍戟耀龍光急繕招搖日月章經文緯
武由帷幄救焚熄焰決呂梁誓告六師誅負國勦馘
無容稽頃刻龍韜祕運神莫窺登壇忽變旌旗色材

官猛將紛承風席捲長驅轉飛蓬率土竊疑囚得地
誰知克不待秋冬共驚此役如破竹汾陽制黔揆制
蜀出將入相雙美人山甫吉甫今又復凱聲雷動徹
穹蒼陽春盎盎繼嚴霜遍山白骨復生肉滿目枯枝
垂遠楊山獐野狐已掃穴累朝負嶠一朝裂郡縣新
闢不毛鄉車騎猶濺妖魔血習戰不必昆明池邊夷
安靜民扶犁上公偉績光麟閣策勲殊錫建龍旂野
人受賜終今載風月無邊不用買還我當年舊花村
滄海桑田一任改憶昔棊城慘罹灾死人冤憤生人
哀誰知地雷來復處雪中霜裏又梅開深山猿鶴雲

霞友宵談共酌醜醜酒無懷渾沌葛天民惟解鼎成
數用九心史千秋傳不朽

縣志

永安卽事

梅國樓師

綠窗朱戶永安庄衰草荒臺半夕陽惟有夜郎天外
月隨風猶自照西廊

陳志

自望草過綏陽二首

驅馬度深險伏枕亦成眠朝雨人烟少寒雲草色連
亂山開小邑叢樹擁高天荒服來千載勲勞此日偏
亂後地初闢途長春可憐雲山互隱見烟樹相連懸
叱馭寧九折揮戈方二年民勞財亦竭珍重論開邊

過螺水寺次韻

詹淑

草昧誰經始登臨感慨深
山環新墾戶溪繞舊禪林
忍見啼饑色愁聞擊鼓音
太平應有象爛醉且披襟
遊桃花源有石刻
洞隱桃花客競躋幽深
絕勝武陵溪不緣指點應難
入卻笑舟人此欲迷
山藏一竅路透迤隔斷紅塵
總不知想是避秦人未
到桃花流水至今疑

遊鼎山城

唐文燁

山城何奕奕仙梵聳雲端
頂絕千峯伏林深六月寒

孤燈懸慧日列壑吼奔湍
石壁重門鎖泥封一粒丸
行營仍細柳刀劍化芳蘭
欲削封禪草誰登李杜壇
騎龍隨羽化飛錫任風翰
自我逢津引多君載酒歡
墜花方滾滾零露更團團
有約歸靈鷲無心戀好官
岱恆空際出岷嶽望中盤
逸致雲歸岫間情月滿闌
興餘分席去歸路屢回看

遊桃花源有石

周志偉

吏事山中少言尋洞口幽
桃花非往日湘水自清秋
古柏垂崖合晴雲抱石流
寧知城郭外窈窕有丹邱

桃源洞有石

程仲愚

虛石竅中天癡雲時獨發寒煦自覺殊風露匪所及
石柱屹當門迎人不拜揖清響出沈冥空翠宛可拾
磨崖舊字殘苔蘚不敢集陰森行欲盡參差危磴級
飛閣臨高烟竹柏秀林立中有古僧畱幽氣與人襲
真隱何必深元液聊飲吸洞禽知客意殘啄胡麻粒
太白亦有猿狂歌松嶺急寄語避秦人問津良不易

並同上

蟠溪寺

羅洪先

懶去京門帶曉牌書囊又向此山開有錐著地非貧
士無句驚人豈俊才劍掛床頭龍臥穩詔從天上鳳

銜來書生洗滌巢由耳飽聽松風坐石苔

正安志

遊桃源洞元妙觀

佚名

空山樓閣自崢嶸策杖來時青鳥鳴雲滿苔陰仙路
合風迴蘭氣野香生吹笙蕭史元無分放鶴林逋似
有情媿我重來渾是夢桃花紅爛眼雙明

陳志

遊桃源洞

當八後卷沿
陳志誤編此

任喬年

勝地將無同嘉名欲無辨塊亦許桃源越客冠文冕
憶昨在沅南晡日檀車幘所得頗經奇祇嘗鼎一臠
千古此夜郎幽洞闕闕衍緬若逗臯原天機殊未淺
石戶自穹窿風日相與健側牖燦星詞行墨龍文窺

開徑失繁英愁驚歲華晚更盡支鹿床復果胡麻飯
栩栩入華胥同對蘇門阮寄謝前哲人聞望遙相展

懷冉璉冉璞兄弟

程生雲

一門竝產雙南金文武才名耀古今余玠雅能資妙
略蒙哥何得陷孤岑濮陽禋祀終宜永湘水宗祧遠
莫尋嘆我後君生已晚春風徒悵冉家林

愚溪書院

柳子何嘗至播州祇因播土仰高流聞風便設陳蕃
榻計日應同郭泰舟幸與劉郎成一易卻教司馬不
終遊只今惟有殘碑在野老津津說未休

茅衙寺弔田惜玉

惜兒舊宅今爲寺芳徑尙畱蘭麝香不欲共迷歌舞
地應思微悟夜郎王苔經細雨啼猶濕樹點寒鴉怨
未央愁聽暮猿聲不斷夕陽孤影上禪房

懷白堂

山間明月畱佳句江上清風憶昔年一自昌齡于役

後愁心終古在湘川

竝同上

蟠龍水長歌行

序

談亮

蟠龍水界接仁桐邁異疫初及人旋及牛竝及山中
雀虎異哉慘不忍言李子冀一自桐來詳言之且作

序以紀其事屬予作長歌

仁桐之交蟠龍水中遺孀嫗哭不止泣言疫癘釀一村延染迄今近百里此方趙氏稱眾強二十四口彌月死可憐趙氏絕門戶弱姓單家誰掩視共傳弔客止青蠅又說孤墳繞白螿親知相識不往來望望且復從遠徙連村鳥雀墮堂除幾日犬羊斃堦底虎倒荒林豹呻箐滿眼腐肉不到柴不仁如爾奚足哀至貴如人曷可比雲封大壑烟火稀日光慘瘦氣如鬼推原沴氣始庚申溽暑輓輸積成疴饑渴鞭笞雜沓加敢怒敢怨痛骨髓五屬千夫半燐火孤族單丁失

依祀閒有疲癯望殞扉又來追呼挈糠粃死亡艱苦年復年難悉指陳盡原委死者無知己死矣生者那復棄耘耔少壯祇今遊樂郊老病伊誰奉甘旨太息何人採風謠願繪一圖呈百里由來人定可回天不然菑害從何弭竊慮處處成蟠龍處處劬僕哭未已我聞此語增感傷草野孰暇續詩史挑燈略爲孀嫗歌賴有紀序人姓李

仲春十九日社友傅乃占招遊大覺蘭若限韻二首
兼呈郡守明府

小隱相攜曳瘦藜招提日暖草新萋風搖石筍撐高

閣花帶天橋度小蹊奏曲喜觀魚聽水化城誰見鹿
橫輓茶烟酒挽判清臥不待辟塵休問犀

跨橋穿洞拂蓬藜春日尋芳踏碧萋蓮社何人能載
酒桃花入寺亦成蹊卽看杯渡超三島端望褰帷式

一輓卻笑頭顱僧已像漫言馬客貫文犀並讀開

過芝岡 通 醉所

歲宴偶到山人家 一徑斜陰陰林館白石

靜空庭雪壓枇杷花

石頭山

磊落一堆輕重石嗟峨定不混泥沙焦巴不許人雕

琢本色年深分外賒土人謂石之粗黃者黃焦巴

鎖江橋

是水魚龍電尾燒祇緣蟬鎖江臯千山萬水齊收

拾兩岸清風一擔挑並丈雪語錄

贈西山休和尚 徹 字邴

一帶橫高岡西山獨宛轉曲徑縈崖巒蒼翠如可攬
峻嶺勢嵯峨行人到者罕羣猿抱子歸衆鳥呼雛返

洞口白石橫鵝池春水滿犬吠白雲間雞鳴青嶂晚
中有閒道人春秋都不管危坐但焚香貝葉手中覽

怪爾城市人碌碌謂予懶

遊西山

西山峻且高雲霧連朝夕古木似龍蟠石如人立
猿猴發妙音好鳥聲非一中有梵王宮巖翁親手闢
金碧輝煌莊嚴亦奇麗乘興頻來遊不覺偶成偈
五涯寺

清水方且廣五雲居其上竹徑入林深明月時來往
鳳嶺鬱嵯峨空谷傳聲響山居雖幽僻殿宇亦宏敞
彷彿似雲門依稀若瀉仰遊人到此間居然天際想
黑澤水靜室作

徑曲層層石窗開面而山鳥鳴青嶂裏花落碧巖間

息慮終年住忘機盡日閒溪頭新月上流影到前灣
聞僞軍至苦竹關

亂離知又甚攜僕入深山涉水驚黃麀穿林走白鵝
風來聲動樹雨過石添斑誠眾休喧耳吳軍已犯關
楊柳水送勇識師住白巖

連宵不忍別再四敘寒溫世事只如此浮名何足論
攜將楊柳水去洒白巖村沿路梅花發餘香清夢魂

題神仙巖故址

在朗里洞
青寺之左

仙人何處去修煉已成功白日飛金鼎青雲羨老翁
空餘一片石長在薜蘿中想像懸巖上誰能繼此風

過團澤口椒溪

徑仄一溪險巖高兩岸重午晴方見日驟雨不聞風
木落悲遊子衰憶老翁往來人迹少出入虎多逢
辛酉春避兵涓水聞遵義偽軍催課甚急

避秦三月有餘來萬水千山走幾回臘雪已從前澗
盡春花又向嶺頭開王師進取知何日寇盜相侵屢
見催不但徵求貧到骨荒原痛哭亦多哉

乙丑春聞虎屢次入綏陽城

虎亦何多事山城屢見過驚人猶自可害物其如何

題普門蓮社六言二首

戶外一溪野水庭前幾樹名花隔岸忽聞犬吠江村
定有人家

活潑一灣溪水生成數朶蓮峰掃地雲來弄影掩扉

月上孤松並一芥
集下同

初春椒溪道中聯句

雨雪同攜手張吉
哉高談消路長友朋惟氣合翻花鳥
共春忙吉樹引千山色別庵天通一徑光夕陽浮古渡
巖舟子棹相將庵別

望椒溪寺聯句

巖舟子棹相將庵別

遙指烟村裏

別微茫殿閣生

巖椒花溪水泛

別銀嶂

翠屏橫天際來春色詰雲間響梵聲上方知不遠別

佇聽鳥和鳴

吉

將出桑木關聯句

犬吠隔林來巖前村如可見喬木勢參天青山拖白

練翻卷舒雲自閒飛集鳥知倦巖攜手出重關咫尺

分鄉縣別

庵

附雨中花詞二首遊桃源

王應熊

一道清溪寒瀉玉浪推許輞川洪澳面千疊雲山縱

橫潭洞小坐繞雙足更上高樓凭拄笏又誰是花

源深曲正燕子風斜楊梅酒暖逆旅還清福

白晝寒生溪上曲另盤踞天關地軸看島嶼滌洄瀧

濤驚沸小景巫夔感道是楊家曾占足都化作車

書綰轂要太白詩篇武侯經略纔稱山川福

陳志

遵義府志卷四十五

遵義府志卷四十六

藝文五 詩

國朝

過婁山關

張德地

鞅掌勤王事奔馳過此關馬頭高白日樹杪掛青山
據險雄全蜀憑高控百蠻誰云邊徼遠咫尺即天顏

次桐梓

李鎧同

繞郭嶺雲斜環城僅百家山高通狹棧水曲繫浮槎
香稻村村熟芙蓉處處華到來公舍靜日暮噪棲鴉
龍山關

立馬龍山望不群風沙寒日落紛紛雄關據險迴飛
鳥峭壁凌虛捲宿雲益部西來天外合黔陽南去嶺
頭分細看石碣空題咏誠蜀誰傳劍閣文

抵鄭家場

按此詩鑑題於綏陽五龍寺陳志謂張含輝作誤

落日驅車覽大荒浮雲高捲鬱蒼茫星分井鬼崇山
盡地接牂柯熨道長幾度烽烟餘茂草廿年生聚尚
殘疆慚無供奉才名盛迢遞何緣到夜郎並陳志
西山向未得遊今聞師巖卓錫於此作二絕句奉寄
好事平生謝客同登臨曾不畏蠶叢如何獨被西山
笑翠壑丹巖待遠公

石上當時會未曾卻從圖畫識詩僧何當眼底西山

出行與巖棲杖老藤

石刻在西山寺壁

宿夜郎

張含輝

自入三巴道迷離望遠天峰頭盤磴折樹髮亂雲穿
古洞崩危岸湍流漱石泉杯舟嗟往事仰首弔青蓮
洋川竹枝詞十首

沈

誠吳縣人

金竹城頭白項烏聯翩飛散集平蕪洋川四月春猶
住莫倚危欄唱鷓鴣

穿山透地一溪來照見山城翠靄開爲問達摩江上
客春帆細雨幾時回

螺江九曲影迷離疑是茗溪與雲溪倘把柔桑溪上
種吳儂忘在夜郎西

芳塍漠漠夕陽天村女攜籃徧野田蠶豆已成豌豆
嫩菜花風裊綠楊烟

宣慰威權望若神卻將脂粉困斯民娶妻艷說田雌
鳳笑殺桃花馬上人

釣魚城下水沄沄扼退西來十萬軍不信將軍能養
士至今荒隴積愁雲

聲聲低喚賽蘭花曾記春燈唱採茶我是吳兒心木
石一迴凝聽一咨嗟

村農齊唱插秧歌四月城頭看插禾誰道千畦明似
鏡山田終比水田多

十載風塵作老翁哦詩日日對清風燒殘官燭無些
事夢入江南烟雨中

石龍橋畔柳絲絲不爲行人管別離腸斷蓬山多少
恨合教雲雨寄相思

康熙庚申客綏陽思歸念切率歌 楊用和 成都人
綏陽城頭啼暮鴉有客獨立傷春華主人進酒勸客

醉胡琴羌笛兼琵琶琵琶一曲客起舞陽晉山頭雲
欲雨東風吹雨入華堂哀絲豪竹爭訴語謝君金叵

羅典我黑貂裘桃花門巷燕聲軟十千沽酒重登樓
楊生兮楊生汝胡不樂錦官城襤衫破帽長東征洋
川春色濃於酒勸子醉起西南征

偕臨川吉子方往遊螺水約明日同登西山

荻庵不知姓名

西山清妙照城郭碧雲橫空高不落螺江水曲千玻
璃照見橫江兩白鶴吾儕興發能來遊雖無地主亦
足樂昨宵吉子忽思歸萬里江山愁兩腳我生行止
不自主處處途窮甘寂寞不如覓取雲水僧指點烟
螺度林壑君看雲烟無世情幻盡空中幾樓閣故國

難歸且莫歸孤茆可縛姑共縛書生出世本糊塗混
沌不須七日鑿惡郡休嫌古播遷此邦信美停芒屨
明朝杖策君莫惜已有秋色照林薄並新採

哂酒

查慎行同下

蠻酒釣藤名乾糟滿甕城茅柴輸更薄桐酪較差清
暗露懸壺滴幽泉借竹行殊方生計拙一醉費經營
懷葉鄧林副使播州

重巒疊嶂鎖空壕蜀徼孤城近不毛佛現催晴秋閃
閃鬼車啼雨暮騷騷宦途載涉應知味鄉夢頻歸可
憚勞計日江南秋信好黃花酒熟待登高

咏史八首之一

風急降旗舊折竿播州歸甲極凋殘一時管統援師
盡同日滅洪赴死難赤手何須還抱馬白頭無望復
登壇大斤山下逢隋將猶作燉煌戍卒看

賦雞墪瑤華慢詞附

傍松似織比肉非芝喜筠籠初稔肌分理細脆于瑤
柱嫩于玉筍厨孃好瀾觸纖指微防輕損任清涎齒
頰先流欲嚼芳鮮未忍憐伊產自炎荒數陳家九
種圖譜猶賸人間雋味但風前日炙封題遠信秋林
雨過記竹下呼兒采菌便吳鹽雪點羹湯那有者邊

風韻

松織出勞山肉芝見抱朴子九種菌見陳仁玉菌譜

並敬也承堂集

采蕨篇

羅兆姓

采蕨采蕨十指流血血流指未枯腹枵氣將絕山靈
骨露不忍呵猛虎憐人低縮舌朝采采暮來歸一擔
枯根擎入戶餓眼無光喚聲微河頭洗污泥甕中澄
黑水薄粉流雲合小團濃羹撥雪攪長七大婦小男
併手作倉皇一碗纔到箸我觀廩穀藁猶懸市上斗
米值一錢何為徒自苦早作夜難眠老翁吞聲告廩
穀安敢食官帖久開徵穀賤難索值昨與老妻相計
較只恐嬌兒畱不得天容賤命活須臾豈惜區區間

氣力老翁勿再言使我心劇悲當日聶夷中解寫鋤
禾詩寧知密箐叢山裏汗滴土乾未把犁傳聞

聖人下南甸快活春隨堯舜願山東預蠲明年租江南一勾
二百萬六龍敢望踏荒烟

賜租蒙恩已一年惟正所需難驟免節儉有餘方議蠲此諭
令人感且泣兵宜效死官宜廉民口奪食爲爾食那
能坐飽負皇天獨不見夜郎忍饑採蔗人官租未納
難下咽

桐梓道中

流雲奔天天路長鳳凰秃翼飛踉蹌不辭水擊三千
里今日飄零大道旁炎風抑何虐撲地吹塵聚眉顰
溪水抑何清行人汗滴與溪平目眩腰拳僵絕壁以
手捫天坐且立相如慷慨漫題橋陶侃從容猶運甕
君子慎宴安小人懷饑寒君不見播兒雙肩紅肉裂
笑擔鹽簞上前山

贈許司馬

并序

三閩許先生才探龍頷官拜馬曹杜甫窮遊誰爲築
室錦水青蓮長謫又將接武夜郎與小子介骨相憐
幽懷別吐於其行也綴曼詞焉

吾不知閩之異人能有幾獨挺慷慨磊落之許公吾

不知閩之山水何所奇獨生如是之豪雄腰中轆轤
淬芙蓉握手何人當其鋒雷煥張華俱前死神氣鬱
鬱牛斗宮壯心耗盡詩千首筆底時聽蛟龍吼狂來
引滿盡一斗硯礪拉雜隨枯朽夜郎落落司馬署李
白今更歸何處逢余一掬桃花潭爲公踏歌送公去
搜囊卻喜一錢無篋中剩有萬卷書六閩道遠攜不
得畱與王充讀何如

香雨堂賦物

并序

戊辰之秋余入陳明府署中覽壁間李氏雲柯所題
香雨堂賦物因游於堂求所謂十圍苑斯之柳已爲

風雷取去而一尺黃楊蒲伏於荒苔蔓草之中若相
避者獨池中紅裝裊裊迎笑墻側冬青亭亭肅客耳
因卽其韻作思春柳賞秋荷悲黃楊慰冬青四章嗟
乎紅樹旣枯司馬之雄心厯落秋容方淡韓公之晚
節隆崇所寄不同其感一也余詩也乎哉

問訊西堂柳多情共客征隋堤迷舊夢灞水漾空營
月上虛牕影風微散晚晴明年花事煖悽絕聽流鶯
草漫嗟搖落流杯且共傳紅衣寒拂砌碧蓋老擎天
盛夏知誰負高秋見汝妍容華珍自保桐葉正顛連
爾自卑如此何心傲雪霜偶遺造物忌不擬占風光

蠖蛭依迴合蛛絲借遠揚年年飛動意春色到垂楊
報爾歲寒至人驚翠未凋雁來書古色鶴獨顧層霄
苦節世何補晚成時未遙終思回造化紅紫遍霜條
春日遣懷

桐花凍落柳風乾野老無衣久不寒見說寸秧疲夕
雨可能尺布損朝餐五雲自下

蠲租詔百鹵猶高舊杖疲踏畝又傳官長急慚他鶯語慰
平安

排軍遇雨

出門一寸路風雨卽天涯爲謝幽栖客尋春莫出家

出北門卽事

午夢依人半枕斜迷離舊路認桃花青梅慣向盤中
孰莫遣霜風醉齒牙

婁山關

婁山戰血尙橫斑竟少高文照碧山往事已多難記
憶楊家莫恨失雄關

魁巖暮歸

河面輕風散纈紋河邊細柳藉餘曛人歸斷杓斜斜
雨鳥啄荒城片片雲

麻柳灣

宛是當年載酒時一灣春水映疎籬山花莫訝人非
昔且囑東風愛惜吹

並鹿遊詩集

龍蟠蘆洞二首

向廷賡

混混天遺蛻頭顱寄溱澣磊砢錯巖巒開吻儼門戶
展齒入而出若吞復若吐燒藜努前探瑰璋詫所覩
五拇仙子跡鼎益與鐘鼓其中一蟠龍饕餮此甘乳
大聲呼欲起好去爲霖雨

山腹空無際嗒然渴不止張口飲沆瀣傍吸谿流水
洶聲若雷輓鉅鹿戰堪比特憂十日雨洶涌一竅否
汨沒彼原隰秋歛湧穀米疏瀚懷禹功安得及桐梓

桐梓驛

傅之奕

古驛傳桐梓荒亭面遠山馳驅臨使節負戴過滇蠻
蒙水非難渡壺關不易攀人家如野鹿笑指說朝班

過婁山關

杜旭

桐梓知縣

四月長征入夜郎雄關天塹鎮南荒提封久已稱華
土怪迹曾聞肇竹王樹隱旌旗雲外轉巖垂薛荔雨
中長堪嗟車馬空勞碌博得年來兩鬢蒼

太白碑亭懷古

張皇輔

陰雲漸散索碑銘雨過溪山一色青萬縷長藤遮古
篆幾灣細水護荒亭金龜冷落松間月杜宇啼殘夜

半星千載升沉雖已定臨風猶欲叩山靈

並桐梓
草志

丙戌午日夜郎道中即事四首

李 專下

人生能幾何譬彼駒過隙休居尚復爾况乃路傍客
一年一重午嘉會良可惜浴蘭已往事采葯亦陳迹
努力赴山店須臾日西夕君看榆社翁酩酊度阡陌
季春別慈母承歡訂夏仲哉生明月夜諒有兒歸夢
身世多乖違屢億不一中今日是何日家家剥黍糗
薄暮盼王孫倚問定心痛愧非昌黎才窮鬼未云送
侵晨辭主人逶迤望舊館饑腸作雷鳴待療不可緩
郵亭老健兒飲食正衍衍偶逢不速客意態殊宛欵

蒸豚一盂爛蒲酒三杯煖報瓊我囊溢受值彼意懶
漂母卽斯人古今最稀罕

僕夫聽我言勿懼夜郎道前村有周親十載縈懷抱
入門兩相訝盛壯成醜老童烏不復見孟光亦中天
握巾拭別淚整衣拜新嫂憂喜兩無端銜杯玉山倒
良辰不在家看人佩萱草吾兄更問訊我心怒如擣
白石道

亂石如雲平地起記得路難從此始前山磊砢不尋
常問爾欲行還且止停鞭檢點鷓鴣聲便捷如猿幾
阿兄呼牛喚馬皆同調似待行人太過情

西來寺二首次韻王參軍

雲川

密箐封蘭若炊烟入望微崎嶇經九折剝啄啓雙扉
客繫桃花馬僧披屈昫衣此游殊不惡茗戰莫思歸
畫裏西來寺堪棲象與龍四圍君子竹千尺大夫松
波若湯難覓伊蒲饌易供昔年曾託憇憶聽五更鍾
桐梓對雪二十二韻

白駒真向隙中過又搦蒙恬凍筆呵烟火幾家塊欲
斷乾坤雙鬢影全皤晴泥乍沒來鴻跡寒氣新添去
燕窠集霰諸峰皆玉壘流澌小澗亦滹沱敝裘恥見
肌生粟哀角愁吹鶻打鷺可愛日偷藏昧谷慣眠雲

懶出巖阿袁安戶閉今朝否李愬功成昨夜麼行客
叩門披鶴警孤舟傍岍失漁蓑橫飄瑤屑疑驕甚碎
剪冰綃奈竭何誰爲酒漿悲北斗已占蝮騰避南訛
蕭條漢苑千章柳憔悴耶溪萬頃荷塞上衣沾遊子
淚田間缶拊洞仙歌不防放棹聊乘興未信觀碁直
爛柯樹用繪纏堪笑彼狗將貂續莫嘲他蠅頭字許
孫康映蹇背詩容鄭縶馱舞袖參差籠月窟浮槎咫尺到星河梅花驛路香初動芳草王孫怨已多半幅
紙難畱粉本一聲雷待作春波梁園雅媿裹衣入水
柱從教擁被哦看借茅亭傾竹葉收歸瓦竈煮松蘿

風光忽憶還鄉路繫纜嘉州望大峩

送羅鹿遊姍兒還夜郎

灞亭哭罷已難持又向西風泣素絲影比孤雲安所
託天生我輩欲何爲髑髏且厭人間事烟雨仍畱客
路悲豈有蒼涼如此別長途羈旅各遲遲

湘城桃源洞友人袁子美招飲其間遍覽畱題多引
漁人問津事以見真詩之難得也作此正之

壺中豈止一乾坤滿壁捫苔辨墨痕認作武陵人不
少罰依金谷酒何言沿巖積翠流虛閣辟暑清風起
石門况復招攜洲野興此間幽致足評論

雨中投宿螺螄堰

百城山路舊嶸嶸况復淹旬雨太痴不諒蹇驢材力
薄卻教行客到來遲平疇稻盡翻根倒野店烟猶帶
溼炊借問明朝柳阮畔可能是我醉吟時

婁山關積雪

雪意方當五九驕雄關况復在雲霄哀猿凍縮齊箱
口野竹風吹盡折腰幾尺泥防宛馬蹶一肩鹽憫播
兒遙逶迤出谷思投憩雞犬前村尙寂寥

真安道中

通天磴道望中微棘刺橫拖碎客衣截路有時雕虎

嘯炊烟何處野人扉纔臨絕巘驚亭午卻下深谿見
落暉誓送襄陽山簡後不騎疲馬輒思歸

播道吟十首

自大君休笑夜郎雄關止用一夫當絕憐監子痴愚
甚不守先人舊版章關山

蜀道難於上太清此鄉何處不知名便騎逐電追風
過一見嶮崦也自驚夜郎

前蹊突兀後嶙峋漫向腰間解葛巾果有壺天堪託
憇吾將坐看往來人石壺

莫言回首白雲低毒霧遮天咫尺迷下去直如蛇赴

壑歸來愁與狢爭梯三坡

砒巖轉石下林坳萬壑雷聲已倦聽不有高臺名歇
馬教人進退兩難憑松坎

康莊大道與谿訝不徑而行但有蛇此物近前猶倒
退問君何苦不居家蛇倒

雨中怪石滑於油野店干霄未易投只有行人魂欲
斷如何鬼見也知愁鬼見

巖霜犯曉陟層崖強忍饑腸曳敝鞋說到吾門堪扣
處今朝不比太常齋清齋

一盤西向一盤東九折將無此地同再盃一盃於九

上飛廉那敢復稱雄九盤子

石脊難當野水奔成橋端在鑿山根行人不葬江魚

腹賴有痴僧斷臂恩魚梁河有僧斷臂化緣乃成此橋

白雲集

宿夜郎弔李白

沈漢

誰能斗酒百篇詩豈在清平一曲詞自是君才皆欲殺東風何事怨蛾眉

秋日遊紫霞有感

程春翔貴陽人

西風檻底夕陽斜客裏憑高遠望餘戰壘尚留前代蹟村烟不斷野人家孤峰四面環青嶂勝地千年鬱紫霞愧我跡殊勾漏令荒山何處覓丹砂

紫霞山莊小集次韻

程崇

草堂樽酒月初斜話到離悰興正賒聚漢德星無幾點避秦仙客是誰家深秋碧樹浮丹色落日柴門護紫霞共向此中謀醉隱何須勾漏乞靈砂並陳志

送印明府之遵義

羅雲師

才名遠振百花洲只聽瓊山復有印初見雙鳧飛古

播預知三異匹中牟董風驛路香萱帶彩筆旗亭咏

酒樓指上計程纔兩月童黃叟白擁新侯

遵義詩鈔

採楠木詞二首

唐有勳

蒲圻人

古樹何年占地靈長條紛拂葉青青我來劈破風雲

路驚起虬龍裂石聽

山深林密老檀欒出處商量亦自難今日龍樓爭應

命一天風雨到長安

過夜郎坡

顧汝脩

華陽人

夜郎東去說三坡負戴征人喚奈何我輩風塵憑閱

歷不登泰岱不巍峩

並蔡江志

擒盜為別駕胡公作

李先立

下同

北方盜宜報南方盜宜諱我昔在都門眾口同一喙

南人亦何辜逋逃容此輩茲語蓋有因聽之滋惋慨

既虞饑免脫復防獒大吠未滋追逐擾先受疎防累

獄具動經年殿最皆為礙天高聽則遠包荒藏垢穢

萑苻叢怨藪斯人日告痲癰疽既養成奔出常四潰

從來燎原火蘊自燭石內胡公青雲器英風慄以慨

不忍卽加誅諄諄勤告誨頑梗兇殘未肯回肝肺

一擒皮骨消再擒身首碎三擒心胆裂豺狼失所在

小忍成大濟足以破聾瞶明月清風夜酣歌古遺愛

筆峰寺

山頭餘古寺移住斷巖中處靜禪方穩無名佛始空
鴉巢盤谷月龍護土囊風幾杵鐘聲出諸峰界劃通
濯足河

深山饒積巘一水卽滄浪豈有高人隱仍傳濯足鄉
溪流寒草碧石卧古苔蒼未許漁郎問桃花隔杳茫
萬丈林

連峰青不斷極目轉幽森日抱林陰靜苔封石氣深
草香肥野鹿果熟飽山禽欲盡探奇興愁驚木客吟
花園壩

何處是花園土人今尙傳三家村隔澗四面嶺圍天
細草承趺軟清風入抱圓愚公居谷內來往日蹣跚
播州感興六首

楊家世業已蒿萊雌鳳妖驪稔禍胎躍馬真成蛙坐
井鞭山未信海如杯從來負固無完局豈待殘燒辨
劫灰指顧重關天險失夜郎自大古今哀

遙從萬厯指乾符八代滄桑遞苑枯河右竇融曾附
漢淮西元濟自坑吳花莊粉閣巢新燕鹿堡魚墩叫
夜烏小小山川輕浪擲動人憑弔亦踟躕

候尉承流厯再周中間風浪幾沉浮金門棘老銅駝

卧錦水燐飛鐵馬秋雞犬獨超秦劫火提封不入漢
邊愁流移八郡良家子長得兒孫又白頭流寇殘蜀獨遵郡慶

免八府流移多避亂於此因家焉

朱服飛魚勅賜年天家本意在安邊鄢陵未入吳終
擯繻葛交綏鄭武專絕磴海龍平伏莽元戎汗馬紀
凌煙如何一座桃花塢空向蒼茫弔謫仙桃源上舊有銅柱並

祠總督李公化龍今爲懷白亭

炎精中斷落吳山大有人才出草間冉氏一門鍾國
器天心終古厭時艱未逢余玠龍方卧小試江城豹
已班其奈宋轅慳北向功如韓岳亦投間

輿府靈區井絡間孤懸形勝地圖間錦官西上雲隨
馬銅鼓南封月抱關劍舞秋風難駐足天雷鴻藻欲
舒顏金牛鑿破蠶叢後楊馬當年盛故山筆峯集

咂酒詩爲周海山煌先生作

蔣士銓

地爐暖深甕酒香生座隅緩火生融融感發看浮蛆
截竹爲畱犁露頸沒其趺主客次第嘗吸之嚙徐徐
中通風過簫暗引樂出虛注泉便作醴仙釀逡巡如
甕面白水添甕底醇醪儲貫糟出沈齊氣體成須臾
枳橘性則一涇渭源豈殊神丹變兼金黃芽轉河車
物理可旁悟速化然非歟再拜求釀法酒經須筮疏

杭稻穀梁稷皆可鞠粦俱和以眾露香若點塞上酥
口花歸蜂衙五金同一爐至味啞乃出淺嘗得其粗
蜀有雲安春復有郫筒酷可惜少陵翁所醉徒咨且
東坡不解飲真一堪盧胡苟啖道士蜜寧發調水符
浙人尙越釀六載糟邱居今夕換別腸沈湎不願餘
只疑虹首垂又疑斗柄斲底須吸西江欲續無功書
久出醉翁門才識涪溪醺彭宣醺侯芭是皆聖人徒
題巖門勝境兼向陳淡泉索畫 并序
布春閣下有洞深數丈徑通出入洞壁鑿張三丰筆
跡摩挲已不可識相傳爲桃源洞誤甚余因易其名

曰巖門勝境并誌以詩

焦爾厚 同下

肩輿出城東步履探幽谷一洞忽然開奇絕如覆屋
神功劈巨靈天籟引蕭蕭洞無流水聲亦少桃花逐
飛錫仙人去雨餘長秋菊小民樂昇平吏間少案牘
來遊清道心半菽勝食肉烹茶坐石根小憇比三宿
洞口老青苔洞外蔭竹木花鳥悅閒閒山棗紅簇簇
雉堞橫村雲穫刈稻俱熟人家烟火明聲聲響碌碌
徘徊賦幽勝霜毫乃已禿何處武陵源自昔傳誤俗
錦繡繪山川巖厂總娛目憑仗迂倪手輞川仿一幅
九日野茶壩卽景

幾日綏陽道連宵風雨心出門有山色隨意卽登臨
結陣看鴻雁搗衣聽木砧但開金鳳菊時田徑多黃菊忙裏亦須尋

題朗山關寺壁

僧迎少塵境古刹漫來遊雲壓青山暮泉鳴野竹秋
摩挲餘斷碣眺望一登樓不爲參禪意停驂記小留
雨後之龍洞道中

峯巒疊疊半溪灣積雨初晴入望間烏麥西風梨亞
谷白雲紅樹火燒山昏昏未識金銀氣碌碌偏知道
路頑痛我僕夫瘡我馬一鞭秋意句難刪梨亞村名火燒巖與

月亮巖對皆產鉛礦處並樸村集

懷白亭

張鑑

猿聲鳴罷亂鴉啼人出仙源徑欲迷正欲登亭呼太
白雨聲吹過夜郎西

重過茶山關

張汝霖下

地僻關彌壯憑高勢建瓴江分黔蜀界山拱虎狼形
仄徑人搖膽巉巖閣待銘不須論蜀道茲地已頻經
土飯并序

乾隆己酉黔中歲荒居民掘土以食呼爲觀音粉與
明萬厯間滋陽大饑爲羽士所點崇禎之江北大旱

出自鳳陽山不殊嗟嗟民饑而至於食土德甚矣然
黔民之食此不自今日始通志載康熙間歲饑有仰
此土以活者卽余目所見數年前近地亦掘此雜拌
他物而食且越數百里來擔負者甚夥後以害深傷
人命經司獄封築乃已嗚呼貧瘠之苦不十年而再
見尚忍言哉聊紀以備他時之覽者

流亡將半幾時還饑孳仍聞食太艱土粉權將支旦
夕播州猶是鳳陽山

蒿殘蕨盡止延貧充腹何堪話苦辛不類滋陽仙術
好也同江北活多人

滋陽所出穀有穀氣賦
如和麪比此下咽稍適

莫作長腰一例看誰云爽口易空盤及胸沈滯難多
食寄語羣生漫漫餐

多食有窒
澁而死者

官守常平睡不膺爭傳救苦賴觀音十年未滿重經
見寫罷民艱淚滿襟

桃源懷古

張汝霖

歲貢
下同

徘徊林屋久凄其古洞雲封景物移野徑半凋前代
樹荒山斜仆昔人碑子規喚夢猶三月太白題詩是
幾時今古湘江流不盡此中多少謫臣悲

遊方廣寺

碧溪行盡鳥綿蠻古寺青青接暮山貝葉千層圓峯

外禪心一片白雲間

遊真武山

古樹無多繞殿邊殘碑仆地草芊芊老僧多病難看
客半滅孤燈挂佛前

遵義行署卽事

吳壽昌同下

播地古夜郎其西最近蜀平野饒田疇厥壤稱衍沃
每逢歲大稔旁郡藉輸粟使者駐星軒雅懷寄風俗
溪橋凡幾折行人入深綠重闌結層阿厘市互連屬
殷闐紛在眼殊可快遐矚所念三伏時地炎逼蒸溽
何以清塵襟佇望涼雨足題箋乞山祇膚寸石雲觸

得雨用前韵

黔中夙多潦天漏類西蜀墾田落山陬藉此土膏沃
久晴逾旬日市價譁貴粟止屠事禱祈我意共流俗
畢竟皇天慈靈澍扶苗綠朝滋夕復灑雷聲遠迴屬
坐對戶外峰浮嵐入疑矚雖無疆吏責頗切驅煩溽
應時獲連番於我心先足環視角藝場含豪尙蠻觸
咂酒用敬業堂詩韻

蠻醴亦馳名通侯視管城

用長管吸飲

甕添浮水螳人作

吸川鯨造得逡巡法斟難次第行月場經散夜醉卧

息營營

遵義雜咏三首

寒宜綿毳煖宜練酌有清醪膾有魚今日南黔舊西

蜀何人不羨播州居

供俸仙才遠謫時桃花春水不勝悲誰知懷白亭中

客愛向桃花詠舊詩

烏江東下水潺潺九節灘頭問百蠻說是舊時安撫

地亂雲遮斷定軍山並新採

桐梓驛

李晉下同

郵亭斜對夜郎城寂寞空山冷旆旌一線羊腸低鳥語幾椽茅屋度谿聲啼猿月下陳歌吹怪石峰頭學

送迎幸有青蓮詩碣在藤花遙映草風清

播川廢縣

使節翩翩次播川逢人休問漢唐前楊端西至無通

塞宋室南來有變遷山畔亭臺封茂草溪旁瓦礫漲

寒烟廢興何事關飛鳥偏向頽垣響杜鵑

扶歡埧

董淑昌

巖風淅淅度寒朝驚馬遡征怯路遙夾樹枯藤常礙

日滿溪新漲並無橋獸人多住熊羆館鳥道時逢鴉

雀苗傍晚欲尋投宿處星星樵火出山腰並桐梓草志

曉發白石口

李天英

客心爭行邁不待羣雞鬪夜半捲衾裯兒女方在夢
喚起事包裹欠伸不肯動惟有小衾師呻吟如鳥哢
出門悵遙夜起視天宇空月白照霜寒風尖刺指痛
繒纒筠籠温艱難老母共回顧我徒卒衣單常忍凍
安得向酒家與爾撥春甕

九龍溝

日影不到處孤雲光破碎萬山同一照半領分顯晦
九龍雖云高偃蹇各有態後峰蜿蜒來偶與前峰會
奔騰曳林木奮怒吸溝澮日午疾風吹鱗甲動虛籟
十月二十八日宿松坎適明府毛果亭贊府崔冲霞

於役駐此雨飲達旦明日聯騎送僕酒店丫離思黯
然作詩寄之

天風吹沙塵寒日遞隱見落日童僕饑逢人問村店
路窮知己盡何處投佳彥豈期黔蜀交復見故人面
故人驚我至小樓重開宴包燔異味兼酢醢咄嗟辦
果亭抱餘痛淚落如霜散點點滴杯酒酸澁不可嚥

果亭時喪偶兒女並抱沈疴

破涕強爲歡喧呼作拇戰燭轉夜沈

沈瓦白霜練練心知後會難疲繭不言倦清晨執我
手欲別還咨嗟崔郎喜聯鞍相送酒店丫直上二十
里巖路縈如巴一鞭策飛騎踏破霜中花揮弓落猿

狄長嘯驚鹿麕意氣盡所歷直欲凌蒼霞人生亦何
常聚散如寒雅我歸可計日明年復京華君無立錫
地直以官爲家相期各努力眼底千峰斜
曉發夜郎箐宿三坡脚

侵星發山頭畢景宿三脚經亘六十里岡巒相束縛
跼步攀青冥低心俯幽壑巖巖石壺關壁峭萬仞削
縹緲開崇墉突兀向寥廓淒淒聞斷猿瑟瑟聚寒穉
緬懷謫仙人文藻肆噴礪一篇蜀道難疑是夜郎作
夜郎有劍門其險實相若回看海龍固豈能越黃鶴
茫茫大江流東下潯陽郭慨想迫脅時千載事如昨

誰似郭汾陽贖罪解官爵苟無相士明急難安所託
南登采石樓記我此病瘡飄飄見遺像寒熱斗然卻

朗吟五字詩對此供一噓

余出宰黔陽時道經采石避瘴太白樓有誰明慧以

謗遠謫夜郎天之句今果以米案里議真識語也我才不逮君遭逢誰怨薄
魂兮歸來乎斗酒共斟酌

宿夜郎箐

亂峰回合帶斜陽客向雲中指夜郎鳥道盤空天一
握馬蹄踏葉樹千章箐深景短人心速風緊籬穿野
店荒且買村醪温凍靨醉來不異在寬鄉

並居易堂集

懷陽洞歌

范士琛

仁邑之南清且妍羣山如馬爭欲前崔嵬絕巘不可
上細路起伏蛇蜿蜒蘿遮澗壑白晝暗但聞湍激聲
潺湲忽開翠峽天宇曠古洞半壁森森懸鍾乳磷响
眩心目鬼斧所削神所鑄或伏而蹲如奇獸或起欲
舞如飛鳶倒垂或似青玉玦矗立或似華山蓮羊腸
屈曲露危徑老藤怪石紛糾牽別有一隙側身入廳
牖排列屋數椽仰觀厯厯似星斗俯視凜凜臨深淵
風雷足底隱欲動石窟疑有蛟龍眠洞外屏風列九
疊莽莽一氣青無邊何處飛來此靈異應非禹鑿兼
秦鞭我昔振衣上秦嶽九點盡瞰齊州煙雲海盪胸

叫奇絕虛無路接蓬萊仙此境快為滌塵垢心想恍
坐天門顛偉哉造物真豪縱攫弄刻畫從何年不逢
識者刷榛莽勝處仍逐蔓草捐東山雅興夙所企探
奇肯厭雙屐穿日暮冷風送長嘯邈然著我華妙天
石刻在洞中

播州郡署八景八首

劉詔陞下

官舍春風裏鶯聲細雨間攜柑人載酒驚夢客歸山
相識渾如舊頻啼欲破顏散衙清晝永愛是簿書間

軒窓聽鶯

素魄深深貯雕欄曲曲迴含情頻徙倚無語共徘徊

沼影搖銀漢山光大酒杯等閒三五夜爲待故人來

出房

徑銀床畔籠烟曉色酣流膏資雨潤移蔭共棠甘
欲學投錢潔猶懷汲綆慚烹泉分活水清意淡相涵

橋井
飲泉

偶憶瀟湘夜山城跡已違香風清碧沼珠淚點紅衣
金井聲初斷銀塘聽漸稀衙齋共瀟瑟幾處採蓮歸

荷池
疎雨

爲愛看山色寧高卧閣風堂開官舍北人坐玉屏巾
影散雲峰碧芳回竹嶼叢欲知延攬意城氣正葱葱

虛堂
接翠

共有青雲興憑高一灑然似迎蒼翠色不隔蔚藍天
簾捲黔山入窻窺蜀道懸最憐新雨後芳草正芊芊

傑閣
來青

婆娑槐樹古俯仰肯隨人花落庭無訟柳眠花欲春
可堪行列盡不逐候官新記否榮華夢羲皇尚友真

古槐
卧蔭

煙霞偕傲吏勁節復稱慈影拂浮雲管痕銷泣露枝
朦朧殘月上孌娜曉風遲別有叢深處幽人恐未知

叢竹
浮烟

重葺來青閣落成四首

人巧偏能補地靈爲仍舊制葺新亭檻前松竹今非
昔閣外山雲白復青對酒常愁霜滿鬢開尊時見月
當庭登樓莫悵鄉關遠傳舍初從宦海經

退食從教養性靈匪緣耽樂廠幽亭環州最愛諸峰

美望嶽同收未了青蜀道雲山當戶牖播城烟火接

階庭相招更有潛夫侶東閣曾聞雨度經在座須君再入郡幕

塵生腕底筆無靈闌韻題詩憇小亭聽雨荷花聲瑟

瑟尋芳竹嶼色青青宵分急漏催衙鼓日永閒花落

訟庭未許林泉容我輩山城風月恰初經

樓臺倒影映圓靈載酒何須向野亭人坐清虛生室

白地當尺五接天青楹間綦跡同鳧鳥閣名仍前壁任舊題

上詩篇集鯉庭他日聽鶯懷舊友郊外有太白聽鶯處予取二字以名

軒猶聞絳帳夜譚經閣鄰書齋並百刻

元旦後有懷

計日將回六九春輕雲細雨暗芳辰窮愁漫向燈花
解多病常添鏡髮新攄馬何時馳冀北河魚猶自滯
湘濱來青閣外風光迥詎等飄萍寄此身

郡齋書懷

重裘無力禦春寒黔地風光昔已諳愛好非因營巧

宦平情敢望譽清官二千石媿龍鍾舊望六年增馬
齒殘寂寂播城花信晚倚樓終日對烟巒

遊桃源洞與友人話別

徑穿石壁入 奇生面宏開勢轉夷千仞鷺山懸峩
峩重城雉堞俯累慰迎人洞外桃初蕊繫馬江干柳
未絲他日鄉亭一杯酒憑將春色送天涯

渡鴨池河

疊疊山如駿馬馳此間逝者竟如斯一泓淨漾澄江
色萬笏青懸落照時踪跡何煩漁父卜行程每有候
人知灘頭無復勞惶恐靜聽江聲下瀨遲

並研莊集

上巳修禊事

詞

蘇鯤

破禊臨幽洞 河流聽不窮陰陰山欲雨淅淅谷含風
靈壑神兵 蒙泉鬼斧通從遊悲往昔作賦望羣公
望迴龍寺

蘭若倚天際硃書隱樹間

巖上朱刻天
子萬年四字

曉鐘雲出岫

夕磬雨連山梵響千家靜龍回一水環危梯三百曲
欲上費躋攀

遊香山寺

參差隄柳映春江勝日尋幽問佛幢僧住亂山常伴
虎客來荒寺突驚龙拈花是雨捧休喝集字成詩鐘

詩

卷四十六

藝文五

三

欲掃虛市逃禪堪醉倒愁城似鍊一時降

偷視桃源洞

柳衣脫絮逼清明是日幽洞桃花半落英幾箇漁舟
波蕩蕩誰家樵斧韻丁丁高岡燕雀啼音巧古寺龍
蛇筆陣橫歸路夕陽人影亂山陰風味有餘清

播城秋夜

二更山吐月彈琴坐清夜長空生片雲荷風動池榭
北關泉

清流淺淺割長灘泉在灘心當作人間第幾泉遙憶

金山陸居士中冷清夢幾回牽並或

孟通塘

陳中

一潭澄碧四山青寓此崕哇暫駐停我有憂懷無處

遣水聲嗚咽帶愁聽正安志

次韻太白白田馬上聞鶯三首正曾燠

萬里鵲南飛遶樹方無枝忽聞黃鸝語羨彼遷喬時
昔日龍池上春風垂柳絲歌辭尚堪憶策馬何勝悲
南風吹歸心花發樓東枝嬌女與嬌兒折花相憶時
去國日已遠蠻烟髮絲絲當時公已老豈唯故人悲
夜郎黑箐中公如月挂枝至今仰餘光想見公來時
人生幾何樂無過一絢絲樓上請置酒為君澆古悲

湘山寺

恒安

嶺嶂嵯峨一徑深
荆蘿攀葛碧雲侵
樹藏古寺僧歸定
塔轉虛壇鶴在陰
靜聽清風敲竹戶
坐招涼月入松林
塵心滌盡空無語
為悟真如獨漫吟

遊大魚塘

片刻風流莫浪傳
群賢少長集芳筵
殷勤更盡野人酒
醉把漁塘作釀泉
並新
試遵義罷荒州趙太守
招遊李太白聽鶯處
晚飲桃源洞

顧臯

邊徼荒春風誰傳
聽鶯處太白驂鸞已上天
詩魂尙說尋芳樹
夜郎戍冷一千年
太守今來訪謫仙
公庭無事放衙早
騎馬行春過白田
自言好山尤好古
捫壁尋碑扣巖戶
洞口桃花久不開
野禽寥落笙簧譜
成都草堂名浣花
錦江昨弔杜陵家
卽今懷白堂前路
涼烟斷碣同咨嗟
太守先官蜀中
我來蠟屐方尋節
竹雨槐風暗石室
太守開筵絲管陳
清歌一曲迴斜日
此時舉酒憶舊遊
真人宛在餐霞樓
持杯起舞呼太白
曷不此地成糟邱
吁嗟乎人生俯仰隨
朝暮古往今來總無據
試看千山隔武陵
峯嶺何來避秦路
石刻

醉題湘山寺

趙遵律

頽谷封人狂癡顛攜酒學佛如學仙不知蘇晉長齋
何所以以頭濡叢逃禪通林開士亦好事攬取靈泉
歸福地傾壺重結翰墨緣滿紙拂拂皆酒氣只愁醉
筆淋漓化蛟龍衝檣破壁天矯飛寥空

易湘山寺為雙泉寺歌

萬疊峰巒湧一島攢青蔚翠周牆繞上有參差特出
之禪林鬚髯華嚴樓閣現雲表我困簿書鎖愁城咫尺
香界無緣登祇今撒手脫鞵網躡屐周覽心跡清
其左白雲右響水二洞名雙泉吞吐摩空起不知何年

孟渡翁杖錫飛來參妙旨丹桂繞郭八月天香風巧
結散花緣形影三人太白月鬚眉百處東坡船嘗聞
黔中山童黔水涸如此雙泉良不惡想見混沌初闢
時激盪風輪鼓橐籥或謂白雲洞水出巖邨下作飛
瀑上作霖其中仙鼠為家鳥成羣蝙蝠垂翅如車輪
又謂響水來自沙壩穿眾領石拱喧豗難導引一自
巨靈劈開湘山腰至今猶留仙掌影我謂此郡應以
雙泉靈此寺合以雙泉名拂拭塵埃啟明鏡試從蘭
石深處聽泉聲吁嗟乎謫仙詩歸烏有野仙跡滿人
口在桃源是耶非耶誰分割爭似此泉分派滙源洩化

工堪與古利長不朽漫索蘆洲擘窠書但須輕磨舊

墨濃置酒詩僧索題雙泉神院四字

謙謫仙樓次顧修撰韻

金粟如來自後何寂寞隨風到夜郎蕪沒夜郎棲泊
處詞客猶傳懷白堂居人誰辨烏江樹我來守土周
期年屋梁落月夢謫仙惆悵逐客無消息但聞黃鸝
聲聲鳴白田白田黨壩播州古縲絲軋軋遍巖戶黃
桑紫榭語流鶯分明詩腸鼓吹譜當年洞口尋桃花
錦浪深處仙人家琳琅金薤知多少亭芒畱落空長
嗟祇今閨風吹使節攷古憐才窮石室千載重聯翰

墨緣夜郎從此曜朝日君不見太白折桂淮南遊酣
歌醉卧餐霞樓太守錦袍紫陽樂便擬此地壘麴成
糟邱吁嗟乎楓林青莽迴互關塞黑迫昏暮設此招
魂渺無據瘴雨巒烟放逐臣花香鳥語仙源路

螺螄堰畱別陳復廬丙少府

俠腸義骨陳復廬前驅送客忘歸途酒肉如山不能
下隨風珠玉一字無仰天長嘯萬山紫淚灑烏江溢
江水分付烏江隨淚流此江不枯心不死

濟南焦樸邨辨桃源洞之誤而易其名不思武陵桃
源乃幻境也余為推原所由以廣流傳之見並以質

諸郡中之有味乎盡信書不如無書者

義熙以後神州地秦漢之前化國圖偶托輿區原是幻弗參活相便成愚畫傳荆楚迷真贗夢入氏羌信有無領取淵明言外意不求甚解是通儒

播郡白田壩有太白聽鶯石碣註者據省志清浮蟻綠醅初熟暖入鶯簧舌漸調以爲謫夜郎之作顧此詩李集不載且雕琢纖巧亦非青蓮之筆蓋類書勦襲附會黔志援以爲據是誣太白而並以誤後學也余攷翰林全集有白田馬上聞鶯詩又贈徐安宜亦白田之作雖未明註夜郎而流滯感懷適與地志相符聽鶯處或以此歟夫名賢勝跡賴傳以顯亦因傳而訛琉璃研墨蕪沒於瘴雨巒烟中者多矣安得起金粟如來後身而質之也

白田馬上聞鶯處地誌於今考據詳會否攜柑沾斗酒有無調舌弄笙簧黃桑紫椹畱詩譜白水青橙繞錦堂認取雪泥鴻爪印應知附會誤遐荒

並蘆洲詩稿

戊辰又五月偕蘆洲太守登謫仙樓作

錢學彬

青蓮萬里遷夜郎夜郎重荒冷孤戍軋軋縑絲白田行歷歷聞鶯馬蹄駐自來勝蹟爭流傳那怪詩人強

依附詔書聞許中道歸古調誰憑斷碑註尋山今推
永嘉才考古舊證楚老句烏江巫山了分途落月屋
梁倍生慕况是武陵亦假託何防笮嶺蹙流寓相招
得遂登臨懷曠覽彌助林壑趣此樓合題謫仙名謫
仙或於此樓遇狂呼詩魂噬來遊默矚山靈好呵護
高臺五月風生寒落日千山烟入暮蒼茫獨立餘浮
雲睨皖一聲送歸路

嘉慶丙子初夏試播郡畢登謫仙樓作

程德楷

仙吏謫合蓬萊居聞鶯馬上時躊躇問訊遽肯騎鯨

魚夜郎何必人情疎遯水好訪竹王閭硃花狔鳥紛
相於金雞赦後回旌旗牂柯巫峽爭叩驢播州城東
聳彼阻嵐巖乳洞凌空虛陡然蠶海現精廬闐風生
掖霓裳舒太守翬辰兒童裾日攜琴鶴趁公餘好古
比我倍芳余烏江白田細爬梳世人鹵莽慚讀書風
流文采振瓊琚我來學步寧趨趨滄溟碧浪翻芙蓉
昔年太守雨隨車曾遊雲夢非拘墟黃鶴樓頭紅日
初青蓮來往當遽遽

並石刻

海龍壘詩

任喬年

正安知州

擬作住山人高寒生促迫單衲起蕭騷咄嗟酌雲液

尸居氣不靈戰骨朽盈尺壯士羽商時麗人風雨夕
一束舞吳綾千銖買茲白狐虺獨縱橫淫毒祇自螫
飛燎落雄虬焦土殷于碣鬼妾依佛火玉床生襪襪
對此一悽惋豪華感遙昔已矣勿復陳敗德寧昌歷
龍崖寺
夜坐

殷憂不寐約帶坐朝曦浩露結玄壑從風散雨痕
天心與人事倚伏知何門但洗荒淫憾諸山無怨恩
望

不惜騎邁邁平疇沒海龍石農依兩磧幽磻指前峰
蜂擁荒衙亂蛛交村網重望中雙白鳥間度一溪春

海龍

峭壁幽林勢若竅溪消息問胡麻古樵歌斷雲嵐

下石戶煙迷三兩家卓午尺光分日氣枯籐斜影上

寒花颼颼只恐驚餘虺珍重行人白鼻駒人

經過戰壘氣怵怵鼎食鍾殘促鼎烹仄磴雨荒雙失

足別峰雷隱直孤眈麋田灌藥宜晨露熊館傳餐不

暮耕我亦沿流混軒冕登崖回首又嵐生出

想當星月白幽氛坐以號何如魚復浦精氣激寒濤

石軍

未學古豢龍荒城祗牧馬不識破羣時幾泣青芻下

養馬城

羣鯨徙長林開鑿祗如昨安有六州鍊鑄此千年錯

鐵柱

憶昔探虎穴從茲縛虎子飲石羽猶存飛飛亦徒爾

飛虎

封豕豈不搏終古非飛龍豕若能北首龍不發雙縱

飛龍

蟻穴雖有王不識朝天字若解夢長安日近要荒吏

朝天

高居鬼瞰之寧嬉太平日祗有八關詩天風猶瑟瑟

太平

狡兔餘殘堞初關榜萬安荒溝人逕絕蒸夏草猶寒

後三關

孰使擁之虬抽旋及晨暮何哉決拾時置此臣之鵠

後較場

幽壑湧層臺云是乘雲處華表尙歸來慎作滄桑語

南崖諸詩舊刻一碑今斷

海龍壘兩截在壘上海潮寺階下播州楊應龍自焚處四面陡絕上有平地兼有井汲之不竭真天險也

趙翼

四圍嶄絕陡無門上有寬平可駐軍扼險欲過唐夾

塞攻堅幾費李摩雲國餘暮氣兵猶勁地欲華風賊
自焚五百年來淪異域一朝推廓亦奇勳賦北集

蓉江雜興六首

唐

錕遵義拔貢

月明良夜靜一水遶柴扉漁火犬遙吠江風螢亂飛
襟期隨病減慷慨與時違獨念嶺南客羈縻信亦稀
邱壑適吾曰無勞蠟屐尋僧歸黃葉晚樵唱白雲深
移石泉侵路探梅月滿林今宵雖罷飲莫並廢清吟
展卷忘衰老時緇秋水篇竹籬三徑曲雪屋一鐙懸
掃榻畱佳士烹茶汲遠泉烟村隨處好損辦買山錢
短髮凋秋鬢支筇眺夕暉鄰翁一相見立話兩忘歸

蝶送移花擔雲追過客衣回林鳥雀噪余亦掩柴扉
箕踞長松底澄觀獲所欣斜陽紅浸水飛鷗白連雲
谷響聞猿嘯林香失麝羣茆窩耽佳久亦任綠蘿紛
夜深江上坐靜極道心增清籟生幽壑流泉響薄水
林西孤寺磬沙際遠船燈星斗層霄迴無由健筆凌

古琴篇

唐金

古琴出狄村云是梁公物萬松風雨字銘簡刻在腹
風作史籀文其三楷而樸入先曾祖囊七年蒞陽曲
宦况在當年此木寫幽獨一自歸龍山清風盈老屋
畱傳閱三世古意彌可掬念祖繼漢循晉乘表芳觸

遺澤寄焦桐玩好難等日既重名臣遺又重先世蓄
百年流慶餘金黍屯畱牧狄村道所經故里碑可讀
知琴出是間停馭一神肅狼孟駐經旬先型倍感觸
舊蹟旣久湮遺老概無矚物在人則亡清操貽似續
萬一墜家聲琴須罹羞辱誓言保枯朽神聽不忘勗
太白聽鶯處
黎安理訂

山花滿桃源一峰圍靜綠下有古洞扉閒情緬高躅
萬古謫仙人清風洒山谷至今草木香下載欽樵牧
悵望煙中立鶯聲斷還續

曉發黃魚橋

帽影鞭絲犯曉行不堪愁思百端生梧桐露冷枝頭
月葭菼霜清秋後程野濶天高雲自落峰寒江迴雁
初橫茫茫身事無窮感尙望鄉園萬木平

遊大覺寺

不見釣魚臺上客空餘樓觀此耽耽當年閱老興不
淺勝地而今猶可探雨後苔泥沾屐齒潭陰鐘梵禮
伽藍山僧極有殷勤意欲徧經尋力不堪

過禹門寺

白牛露地祇無情自挂筇枝繞砌行最是夕陽天氣
好雜花深處聽流鶯

題黃鍾巖

陳中簡

古栢蒼蒼石磴遙樹頭嵐氣鎖山腰平林有路人爭
赴幾曲清流過小橋

太平陽戲

李樾

水利頻興功績奇梨園裝束似當時願將川主降龍
事話與吾鄉父老知

三月陰晴好種瓜種瓜不了又栽麻等閒四月間人
少爭比元宵唱采茶

遊石佛洞

凌風拾級到層臺混沌何年始鑿開雲鎖洞天春意

暖分將瑞色帶歸來

食蕨行

王恒

黔中多窮山山窮富薇蕨采之當園蔬味頗備甘滑
鹽豉得所宜差與江蓴列貧民取其根長鋤鑿山脇
刀斧互割斷春杵相碎裂盛以木桶深漬以清泉潔
久之去渣滓不異簸糠麩譬若豆磨漿又若蔗煮汁
更復數滌盪澄之存膏液尚有精粗分精滑粗則澀
澀者黯如灰滑者白勝雪白以貨錙銖灰以供咀齧
賴之稱土倉八口事培植雖非終歲資亦可濟倉卒
我官越山深歲歉食屢竭自顧非長孺未敢擅興發

所愧稱父母束手視鳩鵲爰賦食蕨行授以故鄉訣
采食苦無具稍爲給鹽鐵庶幾得有秋行當理歸

庚寅紀事二首

李鳳翔同下

前歲乾隆戊子秋淫雨淋淋苦不休去年六月方斷
雨連月無雲大日頭始遭淹漬百穀爛繼復亢旱無
少休石裂山焦竹木死枯溪竭井乾龍湫乾田斬斬
無顆粒水田得半稱有秋可憐最是兩山人一切山
糧俱不登高梁火蠟赤如血黃豆火焚餘無藤自從
巳丑八九月家家打鋤備挖蕨有蕨之處亂如麻野
阜荒岡盡翻掘杖瓢乞者非遠人或爲四隣或六親

攜兒抱女至續續犬亦嬾嗥空卧門君不見去年九
月直至今移民壓路烏江濱臘月苦寒正月雪泥塗
辛苦難具論賣兒賣女祇求主斗米議價不道銀或
投幼女向溪谷或棄孤兒前獨行哭泣之聲遍道路
路旁十里百死人絕憐乳婦身已僵幼子呱呱泣在
旁不知其母早成鬼尙作生看抱乳嘗又不見四山
蹋地撐茅蓬遠來掘蕨於此宮雪深尺許蕨難掘蕨
泥充饑哽胡龍食盡蕨泥雪不止死人枕藉山洞中
面如黛色身如柴不棺不衣真可哀茆草野棉具葬
具三三五五一坑埋吁嗟乎噫嘻荒灾民况難爲辭

他年人說戊巳事但視覺軒歌此詩

歲逢巳丑稼不登處處田園播小春播得小春將到
口平疇一望喜青青庚寅太歲忒狼惡三月十九雨
雷雹大如雞卵小如丸竹枝無葉木皮脫四月麥根
腳底黃麥田行過灰染裳割盡一坡無一擔半挑收
盡半坡糧前五月迄後五月一兩三錢米價急寂寂
鄉村少爨煙夜月蕭條聞哭泣樹皮草穗不嫌酸野
菜山蒿不用鹽市中只有米糧貴馬牛雞彘不當錢
父母兄弟妻兒女南北東西各覓觜天親骨肉不相
顧幼倒陌頭老溝死此災此烈豈徒然明者已見於

幾先已丑六月彗星見其長數丈色如烟凡屬災祥
各有自吁民何辜難問天紙短詞粗書不盡酒闌月
落淚如泉

官田壩宅後有香坪老虎洞望峭坡萬人墳水落坑
諸處耕人常拾鐵礮相傳吳三桂僞將馬寶曾將兵
過此考康熙二十年提督周卜世克復遵義馬寶奔
城犯瀘淑大約在此時也歌以紀之

水落坑邊百草黃耕人常拾舊刀鎗圓圓鐵礮大如
卵不識何年古戰場林暗天陰雲濕濕萬人墳上鬼
號泣夕陽燐火散山顛客過香坪皆股栗百年事過

盡沙蟲猶憶昔人苦播中草竊狗偷知底姓父老憎
傳馬國公

登貓山絕頂回至山家飲茶

徑仄藤蘿合林荒石磴斜黃梁依夕照紅子漫晴霞
茅屋幾椽雅疏籬一犬譁山家欣客至老嫗煮新茶

茶山關

茶山稱古渡險絕邁黔滇峭壁千尋立長河一線穿
人從樹杪下石向頂頭懸過客頻來往同嗟馬不前
雷水堰

是堰名雷水楊家舊別莊堤連山左右阜鎮水中央

浪激松杉古風吹菡萏香當年歌舞地憑弔幾徬徨

題婁山關

王以純

雲峰壑樹望重重曾向當年起戰鋒七姓尚餘千載
恨三關無復一九封專房不嬖田雌鳳破國何來李
化龍自古禍胎多女謁誰憐繡闥草茸茸

題鄒烈婦李氏

談中信

比玉人無半點瑕別舟休望抱琵琶惟將一死全名
節寄語狂蜂另採花

春日張岱庵

人龍

明府招同周石帆

際岐

飲謫仙樓

長歌

金章聘

草色花光連洞口紙鳶亂上春城柳對此可以酣高
樓遙勸仙人一杯酒仙人不見意渺茫重鐫舊句憶
研莊當年攜我此懷古唾壺擊碎吾真狂陽湖使者
殺風景暖入清浮生議柄但論山水足仙遊何況犁
眉親照影白田日暖聞縑絲馬上聞鶯似此時五百
年來無此樂對酒莫爲前人悲春風灑灑波濤急夜
月盆湖歌舞息五溪颯沓遡煙霞三峽瀾漫淹日月
夜郎一謫古今哀矧霧鬢烟藉掃開但看江山畱勝
跡尙饒我輩醉歌來岱庵賢宰幽情深抱琴到處喜
放吟灑西草堂浣花里曾以文章交杜陵謫仙酒樓

播州見花時幾度開春宴東山長句擲筆書白也魂
歸定稱羨紫微舍人感慨多生憐供俸此消磨豈識
聲名從此大何曾魑魅喜人過主人大笑呼斟酒勸
君鼓隴吾鼓缶酒闌歌罷月黃昏煙影蒼茫自搔首
趙蘆洲太守於城東桃源山建謫仙樓兼刻太白白
田馬上聞鶯詩曾賓谷中丞以下俱有和作余亦集

李句嗣音

陳懷仁同下

桃花有源水好鳥鳴高枝卻登山路遠正好銜杯時
相攜上白樓玉壺繫青絲仙人殊恍惚惻愴心自悲
流鶯啼碧樹三繞未安枝蠶凋桑柘空客行無歇時

春容舍我去清霜零兔絲當年頗惆悵茫然使心悲
君子有所思鸞與鸞同枝嘆息此人去清風無間時
徒霜鏡中髮長短盡成絲
去去桃花源但爲後代悲

桃源山歌

桃源山色青蒼蒼洞門花落苔草香舊傳供奉謫夜
郎會此馬上聽鶯簧清浮暖入句鏗鏘未見李集見
洞旁不知作者六一堂誰歟假借相誇張河口刺李
綠醅初熟暖入鶯簧舌漸調乃歐陽公烏江旣不在
集中奉酬長文舍人出城見示詩語烏江旣不在
播疆白田渡豈城東湘太白白田馬上聞鶯地在安

白田埧當之與黔志藝文載李白地名傳會不可詳
烏江別宗十六詩同一傳會之誤細究實跡初何嘗後人辨駁喙已長我來望古翻增
傷恨公不真到遐荒半道遽還巫山陽天若假緣入
此鄉犁眉騮掣五色韁舒州之杓玉浮梁琉璃研匣
豹隱囊南冠仙人縱倘佯婢指沙壹奴竹王蠻女勸
酒蠻兒將蠻花裹醉公佯狂一笑踢翻狐狸場提筆
爲爾掃糝糠擲筆光焰萬丈長似此豈特茲洞昌播
山播水皆生光寧至爭託類大匡是耶非耶費評量
大匡山龍安保定以假爲真要不妨長庚萬古夜吐
成都等處皆有芒泉源萬斛流無方平生謫處劇痛腸我知此州公

不忘懷白亭上鶯侑觴醉公一呼當來翔並遵義詩鈔

墜巖辭

並序

趙毓駒

烈婦氏冉諸生梁郁山妻夫沒守義姑欲奪而嫁之烈婦度不免佯言歸寧至虎跳巖乳其子付婢墜崖死時年二十二

南山石何巖巖妾心如山不可移吁嗟妾心姑不知

一解長跪語阿姑兒欲歸寧母家別姑出門去孤兒啼

啞啞兒聲甫住新塚在路二解塚中人長眠塚上樹初

茁憔悴經秋霜勁節不能殺願為連理棲死央不作

倡條棲鳳凰三解高巖巖薛猛虎睨之不敢越乳兒付

婢與兒訣奮身投巖虎驚逸巖有時崩節不滅四解

夜郎懷古

李

楫合江人號秀山

撐舟下夜郎載客訪遺事巖腳鎖荒烟樹根遮古字

讀之不成章酷日悲風厲吁嗟題石人都為人所棄

低首不復言默默憐此意返棹泊河西陟彼南平治

不見南平軍金戈和鐵騎當途瓦礫荒愴然下遠淚

昔為官守城今為牧馬地徘徊四弔之谷口方風吹

日午轉前溪悵斷謫仙至欵步進禪堂蕭條雙古寺

北鄉口占

宦廷銓

歸去情何極殘陽一望烟晚山銜片月涼露下高天

有字憑誰問無營祇自憐行行過北陌蒼色遠峰前

橡繭詩並序

程恩澤同下

黔邵州十三富郡二曰黎平曰遵義黎平以木遵義以繭繭不以桑以橡然非初於遵義人也乾隆間陳君寔教之於是食繭利凡數十年春秋繭成歌舞陳君如生道光三年冬澤試遵義旋過橡林間風策策然葉鱗鱗然記所歷郡皆有橡不以繭今過平越都勻土益沃宜橡因嘆曰處處有橡處處可繭也富獨遵義乎過鎮遠見方伯廉訪宋頌令甲勸民種橡詞懇懇著街亭時夕陽爛如駐馬讀之過思南還萬

校官世超鞞劄出則方伯廉訪督使巡上下游購橡子教播種期三年成食繭利嗟乎居尊官親民爲謀百世利思深哉可謂君子儒矣黔土瘠黔民勞勞無所獲遂殫廢不自振曉之曰利在某不信視某地民遽然顧墻角畦稜有美蔭皆金錢其黠者又慮利與害俱且權之曉之曰有百世利無一日稅也則又慮購繭器織具紛然貲未入先貸曉之曰如購種法皆官爲夫民驕子弟官慈父母也驕乃情慈乃周以周起惰惰乃勉皆可學而能也數歲利必若遵義富甲西南維矣澤職在文字詠歌之可乎分題十各繫四

十言附長篇一則舊冬作也

種樹 橡隨在可植三年枝葉蔚可飼蠶飼後休一
年老則充薪炭新肆出仍飼蠶

種樹三年成三年莫嫌遲今日一丸泥他日千絢絲
將絲比薪炭何啻萬倍爲黃金在枝頭巧者能取之
窄繭 以線貫秋繭縣密室溫以火蛾出配乃孕不
斷火子易出

窄繭如窄花蛹卧小天裡不知春風來但覺卧欲起
雄雌皆蛾眉生子眇難視一朝能上高萬緒從此始

春放蠶 子既出承以橡枝葉於筐能自上卽取枝
葉縛之樹

越孃急蠶食意欲親乳哺黔娘急蠶功一任飽風露
得繭大於甕不顧越娘妬回頭笑嬾婦歌舞博紈素
秋放蠶 春繭就暖蛾自出配乃孕以絲兩頭繫兩
蛾巨橡樹間卽育子著枝葉

秋蛾似蝴蝶置之高樹巔一繩繫兩雌其情不相連
出殼葉漠漠裊絲頭娟娟當其未成時晝夜防未然
毆蠹 害蠶者鳥也蠹也春秋之晝須毆鳥秋夜須
毆蠹野蠹先於柘館故古有爲蠶驅雀之官

馬曰予口甘豈惜人之寒鳥栖螽又來蠶乎良獨難
畏响毆以析避形毆以竿持讒鳥與螽並生天地間
移枝 葉盡蠶未飽剪枝移之他毋驚蠶
葉葉敞如絡蠶蠶饑不禁剪枝縛他枝移家綠雲深
聲若驟雨來蕭蕭風一林蠶娘未入山常懷已饑心
煮繭 繭成投熟湯入菘灰汁乃熟乃縑之蛹不能
生也或曰蛹混沌無知故昔人無捋蛹法
功成赴湯火幸在混沌時繭剛可使柔絲斷難重治
水凍渥以灰古法存於斯齊紈不十年越羅風淒其
上機 絲值蕤繭綢值倍絲功成矣如績學然

絲值蕤繭值織成金滿屋燈火連晨星伊軋擾夜讀
上充公姥襦下剪兒女服衣郎郎不着願換來春穀
利無算 橡可衣可食地寶也

橡粉可療饑橡斗可染皂老枝薪且炭新肄復蠶飽
一物備衣食地乃不愛寶黔富甲天下居者殊草草
永不稅 民趨利避害永不稅乃可與圖始

購種與教織瑣瑣皆官費焉忍復征權如父謀其兒
有衣耀寒暑有金充棟楣土沃民轉勞民勞勞則思
橡繭歌 并序

冬十一月來播州撲頭黃葉風颼颼是何嘉卉繁且
稠云此可婉柔之柔美蔭捲綠春油油彌山彌澤彌
甌窶不煩山奴玉斧修無事紅女青桂鈎葉以爲箔
枝爲幙結茅承種懸曲糲蠕蠕子子紛相蹂天教寢
食得自由自起自眠登樹頭暖日出曝雨則僂蝕厥
新甲奔厥廄神鼓打鼓小姑求宛窳夫人跪樹歐願
生脂扈無生鳩爲毆花豹毆栗畱竹析行晝宵乃休
何如小播長其旂娟娟風露春復秋兩番割繭十倍

收繭熟圓如金彈投蛾飛大與蝴蝶侔杼聲萬家絲
萬抽蠶娘樂逸機娘愁流黃縑素充畫樓可憐龍馬
不上鞦其地乃封千戶侯我來長林采其劉知是櫟
斗其寔揀斗可染皂實可洩高士拾之狙公畱不材
之木值千牛卻顧材木翻包羞黔中土瘠民臞脉何
不廣值上下游計其贏羨裨先疇終歲乃無旱澇憂
有暍其道夏暍瘳有依其土絲衣絺積銖累寸成長
裘衣被直徧西南陬

詩集

和程春海學士橡繭十詩

吳榮光

種稻三年勞種橡一鋤力况土不宜禾礪瘠橡可植

植成葉泥泥用以供蠶食黔民勤且懼胡弗事絳織
絳織夫如何始事寒秋繭寒來知屋深暖至知春淺
雙蛾起累卵瑟瑟復蛩蛩昨夜東風多枝頭新綠展
新綠復新綠忽忽今年我有八育種汝有九春天
借汝一枝春引我萬絲纏枝上日漸高且莫驚蠶眠
蠶眠又成繭秋事繼自今問我何所事秋蛾已滿林
蛾子下如雨風露相澌森千喙萬連蜷眈窺奈饑禽
饑禽復胡爲重以螽緝緝安能去之逃色斯澤不集
我欲衛其生豈必傷汝及春聲與秋影中有人獨立
獨立人再思葉盡防空枝就食但求飽守株難爲饑

今日碧雲合昨日碧雲離碧雲去復回相送老不知
繭老絲始成繭熟絲始出以身殉其絲衣被及萬室
我繭一灰柔汝繭三絲密留絲人或來如念保素質
素質定不貴終日歌七襄大姑織徒被小姑織裙裳
更有機前人夜讀聲琅琅秋燈勿辭勞已免春來筐
春筐何但免成繭勞逸判回視吳越蠶功倍而事半
况彼樹有實園收未貧歎肆者汝洗染朽者成新炭
山炭與山蠶俱不入課則

聖恩寬邊隅重戒盡民力塗畚賦本輕微末何足殖寄言

循良吏慎勿擾作息

荷屋集

藝文五

卷之六

禱雨老龍洞

朱元暉

山形如龍趨古鳳州依古城一山高懸老龍洞老龍
 戲水水護龍水撼洞門山欲動腥風颯沓古木號雷
 走絕澗山魃逃攀援屏息敢逼視挂枝公鳳升木獠
 洞口羅列石筍六瀑布晴飛珠萬斛茲石大抵子姓
 行俯視他山殆奴僕風塵老我一微官蒿目難禁眾
 姓艱五月無雨至六月秧田龜坼山糧乾樂源山高
 田更薄溝澮皆盈轉眼涸就令豐登尚苦租胡然旱
 魃還為虐我祝老龍龍怒飛排雲叫闔奮鱗鬣始知
 高卧東山客也有蒼生霖雨時正安志

忠國公王祥

羅星

夔門一坵走封狼捲地兇魔詎可當
 獫狁亂鳴悲鼎沸人民紛竄飲鋒芒
 總戎何策招諸將閣老無師泣大荒
 剩有牂牁支半角手持三尺惱王郎

王師西下剪渠魁萬馬東馳驟雨來

順治三年大兵殲獻逆於鳳凰山四偽

將東奔渝州再破逆屠綦

更奈渝州爭似洗可堪綦市竟成灰

光誓掃妖狐跡地利容爭上將臺
 奪得故營收戰士滇黔處處起塵埃

眼前何處不荆榛諸將相持絕比鄰
 赤手肯扶殘社稷丹心惟凜舊君臣
 姚黃敢作搜鄉賊孫白原非翊

蓮人幾軸除書封拜重天南回首泣楓宸

由掛印將軍封綦江

伯晉忠

八年辛苦守危疆國步艱難劇可傷宋昂有身棲海

島張巡無淚灑睢陽長圍已逼三軍壘寶劍猶飛百

戰霜血濺烏江殘局了孤墳誰與祀南荒

祥既列相傳全家遇

害

綦江志

湘川晚眺雲峰突出俄而大雨

周際岐

下同

聞說廬山不可見誰知廬山已上天天公謂我不識

此山真面目乃命巨靈掇入空中懸造物鑪錘特光

恠鍛鍊羣龍鬥躡躡一瀉銀河數千丈瀑布奔流飛

紫烟頃刻收藏無所有不識廬山何處走有人來自

九江邊為我備問五老諸峰仍在否

藥魚歌

藥魚歌邇來湘水絕清波大魚已死小魚多群兒游

手無職業夜半裸赤聲相呵長罟大網不稱意燒天

炬火星駢羅藥汁淋漓順江下毒透石穴攻潭渦陰

風吹轉月光黑奔蛟走蝥號靈龜一番斷送數十萬

幾番淘汰誰逃過馮夷屏息不敢出真宰上訴泣滂

沱吁嗟乎竭澤而魚古所戒藥魚聚殲理則那

遊大覺寺

欲覺誰能覺蒼涼人梵宮闌雲嘗繞座老樹半擎空
米藥僧何處呼名鳥不同一聲吹鼻笛歸去月明中

晚渡湘川

日落漁磯晚粼粼雁齒排急流翻夕影窄步窘芒鞋
冥想天梯穩風愁世路乖好隨滅明去吾道與誰偕
湘川書院

屋漏雨廉纖蕭蕭白髮添書多愁日短衣破苦風尖
愛客難賒酒調羹欲借鹽秋心何所極卽物韻頗拈
登謫仙樓

一曲清平按節歌從茲供奉已消磨魂來魂去楓林

晚江北江南詩思多紫葢未殘聞睨睨青橙無據費
摩挲郎州自昔仙人少此後登樓取次過

海龍壘

七姓沉寃久不堪紛紛羽檄問貪婪重關夜斷飛龍
塞細柳營連洗馬灘風滿弓刀催尺組天低巖壑擁
虛嵐千年勝地終成孽到底收場佛一龕

獨約徐通尺五天霸王宮殿梵王田危樓破落半灣
月冷竈蒼涼一縷烟劫火山中銷戰骨鷓鴣聲裏悵
歌筵美人立盡烏江水剩有殘紅斷堞邊

並石賦詩集

登謫仙樓

余時若遵義

桃源久著謫仙名况復高樓結構精
舊日愁心憑寄月此間遺跡說聽鶯
清風總灑乾坤盡爪印休將是
否評要識武陵猶幻境不應才筆壯湘城遵義詩鈔

平樾峰太守招飲謫仙樓

賈克慎同

夜郎曾未到何處更聽鶯王簡亭事類賦注云爾以

湖蒙詔放還並夫到夜郎云為切攀依意無嫌附和聲仙才空萬

古靈境冠邊城尋勝懷前度欣飛驥尾名前歲試同

刺史曾邀飲於此

主人文雅剝折簡更招呼已蠟登山屐偏張欲雨圖

淡懷傾靜夜詩味勝醜醜勉步尖以韻長才媿大蘇

戊戌仲冬仁懷從戎紀事五首 周作楫

捧檄星馳數去程庚郵迢遞歷山城千層鳥道捫蘿

上九曲羊腸叱馭行是處峰高難見日長年霧重不

逢晴小溪口接磨刀嶺並賊巢近地大夜都聞畫角聲

國家大事在和衷夙夜辛勤想數公中丞賀廉訪李

垣李廸記糧原有冊蕭何轉漕不言功三軍醉比投

醪共一幅圖開聚米同畫賊巢形勢分寄省門帷幄運籌勞遠

訊幾番零雨念徂東

雙旌暫駐倚元戎麟閣光儀重鄂公軍門余紫光閣畫後時已調福

建百戰威名馳塞外六韜成算在胸中據鞍不怯黃

巾焰縛炬同祈赤壁風積感果然天助順焚巢烟漲

徹宵紅方伯慶策用火攻同禱武廟

山頭隨地滑如膏不于深愁步不牢雪片沾濡新木

屐軍中均泥痕狼藉舊貂袍站牆驚破三更夢接令

喧傳萬籟號凱唱曰歸君且住應知選擇任賢勞謂

辦善後

漫說從戎顧盼豪翻多故實笑吾曹短牀夜話方捫

蝨長鬣朝隨亦帶刀急就字真磨盾寫難禁癢止隔

鞞搔夜卧均菜根咬得成佳味分餉餘波豈濫叨中

其類

鞭春曲

平翰同下

一牛分五色多黃而少黑赤白青間之乃占吉戊德

拜手祀東皇吉日臨遐方遐方無餘事但望千斯倉

頒春復鞭春粵自太古始饒得春風歸人人歌樂只

騎竹太平歌橫笛祈年曲牛背夕陽紅馬蹄春草綠

送寒隨解松春來繭如瓮東隣與西隣瓦盆醉聲開

看看柳眼青漸漸桃腮赤韶光喜動頭遲遲春九十

播州古夜郎地處西南荒紫氣忽東來萬戶增輝光

懷陳省菴劉研莊兩太守

爲政不尚奇爲官不在顯苟有利民心樹棠人勿剪
新奇等煩苛難與言美善貴顯同古今浮雲一時卷
惟有循良稱徽猷遠亦闡古來恭茂徒千載舌猶趼
何以愛如斯感人誠不淺不才任宰官無一事堪選
茲來領郡符停鑣尤懼喘龔黃未易希規隨切懷緬
播州古夜郎山箐地且褊雖無昆池波卻連蜀山棧
不聞跳月歌並調蒲里衍美哉農與桑葱翠望青巘
郁郁多人文接之各敦勉培養者爲誰南金繼北銑
劉子富文章設帳求博辯於時學廡脩無不勸黼冕
陳子澤更深功用精運轉剗石劈荆榛創之以橡繭

宵深婢在機日晡奴行畎至今賈客通家家食豐腆
民以慈母呼伏臘薦一臠有功民祀之嘗亦攷諸典
不敢壅上聞寸心爲一展二子皆我師明德難躬踐
瞻彼衡岱雲不覺心顏覩

秋日山行

曉發露未晞清光動林樾稻香涵霏微山色自幽絕
古澗鳴流泉疎松挂落月此景屬間人何脩入宦轍
秋日游湘山寺用東坡臘日游孤山韻

山名湘水非湖雙泉細流差勝無有時松風激澗雨
龍吟虎嘯獮猿呼往往驚起隣家拏慣聞反覺入耳

娛清秋氣爽遠峰逼蜿蜒一帶川澤紆意擬此間結
選廬縱不久處亦不孤松根可劖千歲茯苓潤底常生
九節蒲食之顏色敵凡夫不必更愁日欲哺人言三
丰舊曾到壁留爪跡當畫圖至今洞口春有餘温涼
夏屋同遷遷詩成一笑若償逋此時妙景難盡摹
正安新建書院親往課士贈周魯兩刺史嚴劉兩廣
文山長鍾蔚軒副車並示諸生

正安拓上肇漢唐後先黔蜀劈巖疆州人久已習禮
義近復敦固非蠻荒惟有山川不改舊奔騰巖嶮壯
殊方深疑陰壑潛兕豹亂如日夕下牛羊晦明風雨

非一狀出沒神物時昂藏

州境水根渡北山巖峻削每雨必兼水雹他處無之

歲歲失收附近民多饑等今春屬刺史以牲酒禱祀山靈因而大熟卽令歲以爲常鄉人已鳩工立電神廟我行五日始近郭數程路抵千里長村墟寥落爨

烟少頗訝官道何荒涼牽輿旋繞千丈碧別有塵宇
藏雲鄉巴山劍門以臆度芙蓉江上烟蒼蒼憑高弔
古發深省文獻不足徒徬徨舊聞尹子此講學至今
務本畱其堂我來俯仰敬陳跡斯人千載猶馨香試
思教士是誰責肯與刺史辭勿違疎謫自媿空洞腹
爲致臯比鳴鳳岡探源問難富儒業學子要令惜寸
光固知濟濟多美器以今視昔毋相忘

鄭子尹珍莫紫香友芝兩孝廉偕幕客方仲堅凝姜

丹輪冠桂秋日訪城西桃溪寺歸來各出吟篇用子

尹韻酬之深慨俗塵未洗不獲共此清游也

深居獨處山為囚欲超塵步控錦繡手無強弩心射

侯力持中正焉用謀我來間關煩轡鞞三年問俗無

少休刻鵠類鶩慚鳧鷗行藏隨遇任去留無計歸田

時夢游仰觀白日青天悠未容濯足萬里流便當竿

進百尺頭志堅節勵懷清修聲名未必不見收請君

一笑張其喉侈言聊以祛俗愁曷若共謁優曇優新

詩各出如新秋長篇當舉大白浮酒香和韻手自笏

短句清逸味更幽茗飲雪椀與冰甌諸子忘形意氣

投範以禮教慵趨樞此時令我思若抽欲往不往心

由由本無罣碍復何憂逃禪且樂天一畝桃溪寺隔

城西樓佛眼自照無比邱一廬淨掃若蝸牛為畱詩

客相唱酬歌者自歌謳者謳聲與松風鳴颼颼試問

此游得記不歸來把盞消恨惆酩酊猶道旨且柔一

醉庶幾忘悔尤士不懷祿靡貽羞何妨偶從方外求

與物隨緣着處闌黑甜鄉裏聞勦勦

反戍九日登高用坡公次蘇伯固詩韻

武林賢守繼元和蘇白情同近薛蘿迴望鄉關心欲

醉爲敲詩句手頻搓霜清我髮因時改歲稔人家得
穀多今日借名一游覽馬前歡聽大田歌

播州城南偶成

播州城南天下稀千山萬山聳翠微農驅野犢時時
出樹養春蠶葉葉肥別有仙源開古洞最宜潭月映
巖扉人家多傍清溪住一雨階前上水衣

龍山之會適福敏齋識副戎楊星垣書魁大令胡協

堂祖寅參軍亦至即席口占

地非彭澤逢陶令坐有參軍想孟嘉今日元戎不好
武笑看太守白簪花

播州竹枝詞十五首

吳僧橋下江水紅竹颺溪邊多釣翁琉璃硯匣儻安

此筆墨蛟龍秋浦同吳橋在東門外沿江多染戶晴
天出曝紅綠浸江大佳境也竹

颺溪在北門外
三里流入湘江

家家門外種青桐家家虔拜馬頭娘小姑絡絲大姑

織蠶事忙於農事忙

石角山腰土皮薄三斤稗鎔十斤鑿年年山上生出

田不患水田患田腳郡多墾山爲田望之如梯溉田
大半恃雨然亦鮮旱者爲腳崩

補劬
爲勞

近日晴多不漏天百錢斗米說豐年忙求隣女作新

婦女大於郎好種田

蠶叢曲折路崄呀犬吠荒村三兩家每到場期人似
蟻趁墟歸去日西斜
人人說道南籠好誰知人去多枯槁有家切莫輕去
鄉寄語東家隣舍嫂

小桃花下是桃溪三枝兩枝竹外低無限春風吹紫
陌誰家紅袖過橋西

十三小小姊妹行女紅纔學學縫裳還將吉貝條條
線自織嫁衣新樣裝

伴雲峰頭新月鈎卿雲洞邊蠻烟收如此風光更應

好何須海上問羅浮

青山一髮指江南以多勝少稱黔南黔南四時似春
暮可是江南三月三

難得清明日日晴採茶女兒連袂行相約明朝更須
早燈前梳洗聽雞聲

小麥青時大麥黃黃雲飛卷便蒔秧山田那得都如
此算我膏腴近水鄉

田家最怕是催租租吏上門甚剝膚若得好官真個
福縱遲一日不追呼

嫁夫莫嫁輕薄郎出門不念家與鄉娶妻莫娶豪家

女入門但曉飾與裝

六月十五賽蠶神當年太守濟南陳做官何事不做
好兒干女萬盡曾孫

次韻陳煥巖體元海龍固誌感

黃樂之

樓殿遺基絕嶺頭當年失險媿先侯

固內五鳳樓前楊應龍刻石論

內有易曰王公設險以守其國我先侯得之矣等語陣雲空矗飛崖暗霸氣潛

隨落木休面面火光先喪膽重重關破更何謀可憐

八百傳家業付與烏江一水流

黔地晴少雨多作二絕以自解

日日東風捲濕雲濛濛烟雨灑黃昏黔南地氣渾如

此九月天晴更罕聞

朝來白露喜晴占盡日陽光映畫簷此景常留治人

意無如過眼又廉纖

同陳煥巖宿泗渡逆旅次韻

四圍烟雨望模糊路聳中央雪嶺孤暫息肩輿同野

酌手僵頻暖小燠爐

潘穉青同年將歸晚城囑余作畫并題句贈行

東風渺渺水雲興遙憶江南兩月程惆悵去帆千里

遠夢魂應念白田鶯

辛丑夏因病乞歸畱別遵人士

潘光泰

備荒須法長孫平耿李遺規亦可行五月圖謀方締
始三春作輟又遘征雖無害馬當前齧恐有哀鴻向
後鳴爲語諸賢仍努力莫教此事敗垂成遵邑義會
余於庚子
九月始倡爲之今公計城鄣所捐已不下七千
餘石皆諸紳士勸輸之力惜尙未覩其成也

遵城八景

李鎰

濟川功業建高標又跨飛虹石作橋萬里行人浮寶
筏一江煙雨盪輕橈城邊鳥散秋能渡峽底魚馴夜
不驕遙憶秦淮何處是依稀明月聽吹簫吳橋
夜月
極目高岡落照西天風吹徹碧雲齊峰頭亂墜桃花
雨寺外平鋪綠柳蹊拾翠人同飛蝶醉尋春路逐早
鶯啼停車坐愛茗華晚幾度紅妝送馬啼紅花
晚風
天闢桃源好問津到來不羨武陵春亭前供奉碑猶
古壁上仙翁句有神絕壑嶽寄懸薛荔飛雲鬢隸隔
風塵祇今滿地桃花放洞口空傳憶故人桃源
仙跡

雄潭急峽殷如雷一派驚看匹練開水面有羣空冀
北灘頭不住門龍媒沉沉暮雨千林咽獵獵長風萬
里來更卜陰晴知歲稔只今戈甲咏臺萊洗馬灘鳴
山城高望數峰丹泮水宮牆絕頂盤形勝當年開鳳
穴風雲此日看鵬搏絃歌徧繞湘川郡衣鉢遙傳杏
樹壇更有文翁能化蜀沿溪桃李屬同安飛鳳真穴
泮柯城外盡青山脉有迴龍去復還泚水滌河翻石
岍晴砂曲折鎖江關橋橫野渡蒼松合寺隱懸崖碧
鳥間我欲穿林探勝跡藤蘿天半聽潺湲迴龍鎖水
縹緲峰頭踏不窮尋源何處接花宮溪連野樹僧歸

晚風度疎魚月到空萬籟聲稀丹壑裏三乘悟入白

雲中買山可得無心法日日攜筇叩遠公白雲鍾梵

汾陽功滿夜郎城觀陣亭前按部行緩帶輕裘宵命

酒綸巾羽扇夜談兵天邊早散華山馬闔外新開細

柳營盡道將軍不好武公餘時進魯諸生陣亭決勝

按右八詩當編在抵鄭家場首後

和遵城八景之二 陳瑄

蠻烟斂淨播城東攬轡津梁眺遠空地入錦江通萬
里光搖銀漢落長虹無人更擬西征賦有客橫吹短
笛風廿四橋邊誰度曲鄉心忽在月明中吳橋夜勝

遵義府志卷四十六
爲愛南岡石徑斜聊從曲磴問丹砂風生遠樹飄芳
霞山抹孤烟起暮霞故國不來鴻雁影夕陽開遍杜
鵑花輕軒此日懷潘岳獨對春暉鬢欲華
紅花晚風
按右二詩當編李鎧詩後

遵義府志卷四十六

